

# ጳውሎስ ቆርንቶሳ አሳስ ፃፊዳ ኮይር ኪታ ጋሳ ቆፋ

ጳውሎስ ቆርንቶሳ አሳስ ፃፊዳ ኮይር ኪታይ ፃፊቲዳይ፡ ጳውሎስ ቆርንቶሳን ኤሲዳ ዋሳ ኬላን አማኒያ አሳ ዴቦኒኔ አማኖ ቦላ ዴንዲዳ ሜቱዋስ ዛር አማኖ፡፡ ሄ ዋዴ ቆርንቶሳ ካታማይ ቢታን ዴዒያ ዲማ ዲማ አሳይ ዴዒያ ገሪኬ ካታማኔ አካያ ገያ ሮሜ አውራጃስ ዋና ካታማ፡፡ ሄ ካታማይ ዛልዔን ኤሬቲዳ፡ ዋጋን ሚኒዳ፡ ዲማ ዲማ ኢታ ዴቦን ዳልጊዳይሳኔ ሃይማኖቲ ዳርቲላን ኤሬቲዳይሳ፡፡

ሃዋሬይ ሚንሲዲ ኦዳናው ኮዪዳይ፡ ሄ ዋሳ ኬላ ገደን ሜዴቲዳ ሻሆቲላባ፡ ዲማ ዲማ ኢታ ዴቦባ፡ ላይማቲላባ፡ ኤኮ ጌሎባ፡ ዋሳ ኬላ ዋጋባ፡ ጌሻ አያና ኢሞታታባኔ ሃይቆፔ ዴንደባ፡ ዋንጌላይ ሃ ኦይሻታ ዋቲ ዛሪያኮ ሃዋሬይ ናጊዲ ኦዴስ፡፡

ሲቆይ ያሳይ ባ አሳስ ኢሚዳ ኣቶ ኢሞታ ገዴይሳ ሼሞፖ ታማኔ ሄቫይ ቆንጨሴስ፤ ቃሲ ሼሞፖ ታማኔ ሄቫይ ሃ ማፃፋን ዳር ኤሬቲዳ ኪፊሌ ጌቲቲዲ ኤሬቲስ፡፡

## 1 ቆርንቶሳ ኪታ ኣይፌ ቆፋታ

ጌሎ ቆፋ 1:1-9

አማኒያ አሳ ገደን ሜዴቲዳ ሻሂቲላ 1:9-4:21

ላይማቲላኔ ሶ አሳ ዴቦ ዋጋ 5:1-7:40

አማኒያ አሳኔ አማኖና አሳ 8:1-11:1

ዋሳ ኬላኔ ጎይኖ ዋጋ 11:2-14:40

ኪሪሰቶሳ ዴንዲዋኔ አማኒያ አሳ ዴንዲዋ 15:1-58

ዪሁዳን ዴዒያ ሜቶቲቲዳ አማኒያ አሳስ ማዶ 16:1-4

ኩሻ ቆፋ 16:5-24

1 ያሳ ሼኒያን ዩሱስ ኪሪሰቶሳ ሃዋሬ ገዳናው ጭቲዳ ጳውሎስኔ፡ ኑ ኢሻ ሶስቲኒሲ፡

2 ቆርንቶሳን ዴዒያ ያሳ ዋሳ ኬላስ፡ ዩሱስ ኪሪሰቶሳን ጌዩዳይሳታሲኔ ጌሺ ገዳና ሜላ ጭቲዳይሳታሲ፤ ቃሲ ኤንታሲኔ ኑስ ጎዳ ገዲያ ኑ ጎዳ ዩሱስ ኪሪሰቶሳ ሱንጎላ ኡባ ቤሳን ጃጊያ ኡባሰ፤

3 ያሳይ፡ ኑ አዋይኔ ጎዳይ ዬሱስ ኪሪስቶስ ሂንቴው አጾ ኬሃቴላኔ ሳሮቴላ አሞ።

**ጳውሎስ ያሳ ጋላቴስ**

4 ያሳይ ኪሪስቶስ ዬሱሳ ባጋራ ሂንቴው አሚዳ አጾ ኬሃቴላ ጊሾ ታኒ ኡባ ዋዴ ያሳ ጋላታይስ።

5 ኢያን ኦዳኒኔ ኤራቴላ ኡባን ሂንቴ ዱሬቴዳታ።

6 ታኒ ኪሪስቶሳባ ማርካቴዳይሲ ቱማ ጊዴይሳ ሄሲ ቆንጨሴስ።

7 ሂሳ ጊሾ፡ ሂንቴ ኑ ጎዳ ዬሱስ ኪሪስቶሳ ዩሳ ናጊሼ ዴዲሺን፡ አይ አያና አሞይካ ሂንቴው ፓጩና።

8 ኑ ጎዳ ዬሱስ ኪሪስቶስ ሲሚያ ዋዴ ሂንቴ ቦሬቶናይሳታ ጊዳና ሜላ ኢ ዉርሴላ ጋካናው ሂንቴና ሚንሳና።

9 ባ ናና፡ ኑ ጎዳ ዬሱስ ኪሪስቶሳራ ኢሲፊቴላይ ዳና ሜላ ሂንቴና ፃጊዳ ያሳይ አማኔቴዳይሳ።

**ዋሳ ኬላን ዴዲያ ሻሁዋ**

10 ታ ኢሻቶ፡ ሂንቴ ጊደን ሻኬቴላ ዶናዳ ሂንቴ ኢሲ ዋዛናኒኔ ኢሲ ቆፋን ኢሶ ጊዲዲ፡ ዳና ሜላ ኑ ጎዳ ዬሱስ ኪሪስቶሳ ሱንላን ታ ሂንቴና ዋሳይስ።

11 ታ ኢሻቶ፡ ቁሎዔ ሶ አሳይ ሂንቴ ጊደን ኦሺ ዴዴይሳ ታው ኦዲደሶና።

12 ሂንቴፊ ኢሶቴ ኢሶቴ፡ «ታኒ ጳውሎሳሳ፤ ታኒ አጲሎሳሳ፤ ታኒ ጳዲሮሳሳ፤ ታኒ ኪሪስቶሳሳ» ያጌታ።

13 ኪሪስቶስ ሻኬቴዴዴ? ሂንቴ ጊሾ ማስቃሊያ ቦላ ካቁቴዳይ ጳውሎሴዴ? ዋይኮ ሂንቴ ጳውሎሳ ሱንላን ፃማቁቴዳቴዴ?

14 ታኒ ቃሪስጳሲኔ ጋዮሲ አቴን ሂንቴፊ ኦናካ ፃማቃቦና ጊሾ ያሳ ጋላታይስ።

15 ሄሳ ጊሾ፡ ኦኒካ ሂንቴና ታ ሱንላን ፃማቁቴዳታ ጋናው ዳንዳዔና። [

16 ቃሲ ኢስፂፋኖሴ ሶ አሳካ ታ ፃማቁዳይሳ አኬካይስ፡ ሺን ሃራ ኦና ፃማቁዳኮ ሃሳዪኬ።]

17 ኪሪስቶስ ታና ከቴዳይ ዋንጌላ ኦዳና ሜላሳፊ አቴን ፃማቃና ሜላ ጊዴና። ኪሪስቶስ ማስቃሊያ ቦላ ሃይቁዳይሲ ሃዳ ጊደና ሜላ ታኒ አሳ ጨንጫቴላ ቃላን ኦዲኬ።

---

1:12 ሃ.ኦ 18:24    1:14 ሃ.ኦ 18:8፤ ሃ.ኦ 19:29፤ ሮሜ 16:23    1:16 1ቆር 16:15

ኪሪስቶስ ያሳ ዋልቃኔ ጨንጫቴላ

18 ኪሪስቶስ ማስቃሊያ ቦላ ሃይቂዳይሳ ኦዲያ ቃላይ ቆይደሳታስ ኤያቴሌ፣ ሺን ኑስ አቴይሳታስ ያሳ ዋልቃ።

19 ጌሻ ማፃፋን፡

«ታኒ ጨንጫታ ጨንጫቴላ ቆይሳና፤

አኬካንቸታ አኬካ ባሌላና»

ያጌስ።

20 ያቴን፡ ጨንጨ አውን ዴዒ? ሂጌ አስታማሬይ አውን ዴዒ? ዋይኮ ሃ ሳዓ ኤራንቸይ አውን ዴዒ? ያሳይ ሃ ሳዓ ጨንጫቴላ ኤያቴሌ ኦሲቤኔ?

21 ሃ ሳዓ አሳይ ባንታ ጨንጫቴላን ያሳ ኤሮና ማላ ባ ጨንጫቴላን ዲጊዲ፡ ኤያቴላን ታይቤቴያ፡ ኑኒ ኦዲያ ቃላን አማኔይሳታ አሻናው ያሳ ሸኔ ጊዲስ።

22 አይሁደቲ ማላታ ቤዓናው ኮዮሶና፤ ቃሲ ጌሪኬቲ ጨንጫቴሌ ኮዮሶና።

23 ሺን ኑኒ ማስቃሊያ ቦላ ካቂቲዳ ኪሪስቶሳ ሳባኮስ። ሄሲ አይሁዳታስ ቆቤ፤ ቃሲ ጌሪኬታስ ኤያቴሌ።

24 ሺን ያሳይ ፃጊዳይሳታስ፡ አይሁዳ ጊዲን፡ ጌሪኬ ጊዲን ኪሪስቶስ ያሳ ዋልቃኔ ኢያ ጨንጫቴላ።

25 ያሳ ኤያቴላይ አሳ ጨንጫቴላፊ አዴስ፤ ቃሲ ያሳ ዳቡራይ አሳ ሚኖቴላፊ ሚኔስ።

26 ሂዛ፡ ታ ኢሻቶ፡ ያሳይ ሂንቴና ፃጊያ ዋዴ ሂንቴ አይ ማላ አሴኮ ቆፒቴ። አሳ ቆፋን ሂንቴ ጊዲን ጨንጫቴ፡ ዋልቃማቴኔ ቆቃ ዛሬቲ ዶኮና።

27 ሺን ያሳይ ጨንጫታ ዬላያናው አላሜን ዴዒያ ኤያታ ዶሪስ፤ ቃሲ ሚኖታ ዬላያናው አላሜን ዴዒያ ዳቡራንቸታ ዶሪስ።

28 ያሳይ ሃ አላሚያን ጌታ ጌቴቲዳባ ቆይሳናው፡ ሃ ሳዓ ካወሻባ፡ ካዴቲዳባኔ ፓሶናባ ዶሪስ።

29 ኢኒካ ያሳ ስንላን ጨቄቶና ማላ ሄሳ ኦሲስ።

30 ሺን ያሳይ ሂንቴው ኪሪስቶስ ዬሱሳራ ኢሲፊቴሌ ዳና ማላ ኦሲስ። ኢ ኑስ ያሳፊ ጨንጫቴሌ፡ ሂሎቴሌ፡ ጌሻቴሌኔ አቶቴሌ ጊዲስ።

31 ሄሳ ጊሸ፡ ጌሻ ማፃፋን፡ «ጨቄቲያ ኢኒካ ሳዲን ጨቆ» ያጌስ።

1:19 ኢሳ 29:14 1:20 ኢዮ 12:17፤ ኢሳ 19:12፤ 33:18፤ 44:25 1:31 ኤር 9:24

# 2

## ኪሪሰቶሳ ካቄቴላ

1 ታ ኢሻቶ፣ ታኒ ኮይሮ ያሳ ቃላ ሂንቴው ኦዲሼ ዪዳ ዎዴ ዶና ቢላቴላኒኔ ጨንጫቴላን ያቢኬ።

2 ታኒ ሂንቴራ ዴዒያ ዎዴ ማሰቃሊያ ቦላ ካቄቴዳ ዬሱስ ኪሪሰቶሳፕ ኣቲን ሃራባ ኤራናው ኮዪኬ ጋዳ ታ ቆፋ ቃቻስ።

3 ታ ሂንቴራ ዴዒያ ዎዴ ዳቡራን፣ ያሻኒኔ ዳሮ ኮኮርሳን ዴዒስ።

4 ታ ኪታይኔ ታ ቲሚርቴይ ዶና ቢላቴላኒኔ ጨንጫቴላን ጊዶናሺን ጌሻ ኣያና ዎልቃ ቆንጨሴላና።

5 ሂሲካ፣ ሂንቴ ኣማኖይ ያሳ ዎልቃናፕ ኣቲን ኣሳ ጨንጫቴላን ዜምፖና ማላሳ።

## ያሳ ጨንጫቴላ

6 ኣያና ዴዎን ዲጨዳይሳታስ ኮኒ ጨንጫቴላ ቃላን ኦዶስ። ሺን ሄ ጨንጫቴላይ፣ ሃ ሳዓ ጨንጫቴላ ዎይኮ ጳያናው ዴዒያ ሃ ሳዓ ሃሬይሳታ ጨንጫቴላ ጊዶና።

7 ሺን ኮኒ ኦዲያ ጨንጫቴላይ፣ ዳሮ ዎዴፕ ሲንጼ ያሳይ ኮ ቦንቹዎስ ገገሲዳይሳኔ ጌሚዲ ዴዒያ ፀራ ጨንጫቴላ።

8 ሃ ሳዓ ሃሬይሳታፕ ኦኒካ ሃ ጨንጫቴላ ኤሪቤና። ኤንቲ ኤሪዳባ ጊዲያኮ፣ ቦንቾ ጎዳ ማሰቃሊያ ቦላ ካቆኮና።

9 ሺን ጌሻ ማፃፋን፣

«ኣይፌይ ቤዒቦናባ፣

ሃይሴ ሰዒቦናባ፣

ዎዛኒ ቆፐቦናባ፣

ያሳይ ባና ሰቄይሳታስ ገገሲስ» ያጌስ።

10 ያሳይ ባ ፀራ ባ ኣያና ባጋራ ኮስ ቆንጨሴላ። ጌሻ ኣያናይ ሃሪ ኣቶሺን ጌሚዳ ያሳ ፀራ ኡባ ፕልጌስ።

11 ኣሳን ዴዒያ ኣሳ ኣያናፕ ኣቲን ኣሳባ ኦኒካ ኤሬና። ሄሳዳካ፣ ያሳባ ያሳ ኣያናፕ ኣቲን ኦኒካ ኤሬና።

12 ያሳይ ኮስ ጮ ኣሚዳባ ኮ ኤራና ማላ ያሳ ኣያና ኤኪዳፕ ኣቲን ሃ ሳዓ ኣያና ኤኪቦኮ።

13 ኮኒ ኣያናባ፣ ኣያና ኣሳታስ ኣሳ ጨንጫቴላን ጊዶናሺን ያሳ ኣያናይ ኣሚያ ጨንጫቴላን ታማርሶስ።

14 ሺን ጌሻ አያናይ ባይና አሲ ያሳ አያና አሞታታ ኤኬና። ሄሲ ኢያው ኤያቴሌ፤ ኡባይ ጌሻ አያናን ፒልጌቴያ ጊሾ ኢ ኤራናው ዳንዳዔና።

15 ሺን ጌሻ አያኒ ዳዒያ አሲ ኡባባ ፒልጌሰ። ሺን ኢያ ኦኒካ ፒልጌና።

16 ጌሻ ማፃፋን፡  
«ጎዳ ዎዛና ኤሬይ ኦኔ?  
ኢያ ዘራናው ዳንዳዔይ ኦኔ?»

ጌቴቴዲ ፃፊቴዳይሳ ማላ። ሺን ኮሰ ኪሪሰቶሳ ዎዛኒ ዳዔሰ።

### 3

#### ያሳ ኦሳንቸታ

1 ታ አሻቶ፡ ሂንቴ ኪሪሰቶሳን ቡሮ ዮጋኔ አማኖና አሳሉ ዳዒያ ጊሾ ታኒ አያናባ ሂንቴው ኦዳናው ዳንዳዒቢኬ።

2 ሂንቴ ሚኖ ካሌ ማናው ዳንዳዒቦና ጊሾ ታኒ ሂንቴና ማሌ ፓሃሰ፤ ሃዒካ ዳንዳዒቤኬታ።

3 ሃዒካ ሂንቴ አማኖና አሳዳ ዳዔታ። ሂንቴ ጊዶን ዳዒያ ቃናቴይኔ ፓላማይ ሂንቴ አማኖና አሳዳ ዳዔይሳ ኤሪሰኔ? ሂንቴ አማኖና አሳዳ ሃኔታ።

4 ሂንቴፌ ኢሶይ፡ «ታኒ ጳዉሎሳሳ» ሃራይ ቃሰ፡ «ታኒ አጲሎሳሳ» ጊኮ፡ አማኖና አሳ ማላ ጊዳኬቴ?

5 ያቲን፡ አጲሎሲ ኦኔ? ጳዉሎሲ ኦኔ? ኮኒ ሂንቴና አማንሌዳ ያሳ ኦሳንቸታ። ያሳይ ኢሱዋሰ ኢሱዋሰ አሚዳ ኦሱዋ ማላ ኦሌያ ኦሳንቸታ ጊዶኮናዬ?

6 ታ ቶካሰ፤ አጲሎሲ ሃሌ ኡሺሰ፤ ሺን ዲቺይ ያሳ።

7 ሂሳ ጊሾ፡ ዲቺዳ ያሳፌ አቲን ቶኬይካ ሃሌ ኡሼይካ አይኮካ ጊዳና።

8 ቶኬይኔ ሃሌ ኡሼይ ዎሊ ማላ፡ ሺን ኢሶይ ኢሶይ ባ ኦሱዋ ማላ ያሳይ አሚያ ዎይቱዎ ኤካና።

9 ኦኒ ኢሲፌ ያሳሰ ኦሌያ ኢያ ኦሳንቸታ ጊዲያ ጊሾ ሂንቴ ያሳ ሾቃ፤ ያሳ ኬሌ።

10 ያሳይ ታው አሚዳ አጼ ኬሃቴላ ማላ ሂላንቸ አናጸዳ ባሱዋ ዬጋሰ። ሃራ ኡራይ ኢያ ቦላ ኬጸሰ። ሺን ኢያ ቦላ ኬጸያ ኦኒካ ዋቲዲ ኬጸያኮ፡ ባው ናጌቶ።

---

2:16 አሳ 40:13    3:2 ኢብ 5:12-13    3:4 1ቆሮ 1:12    3:6 ሃ.አ 18:4-11፣ 24-28

- 11 ኢሲ ቶሆ ዩጌቲዳ ባሱዋፔ ሃራ ባሶ ዩጋናው ኦኒካ ዳንዳዔና። ሄ ባሶይካ ዩሱሰ ኪሪሰቶሳ።
- 12 ሺን ሃ ባሱዋ ቦላ ኦኒካ ዋርቃን ዋይኮ ቢራን ጊዲን፣ አልዖ ሹቻን ዋይኮ ሚላን ጊዲን፣ ማታን ዋይኮ ማቃን ከደኮ።
- 13 ኢሲ ኢሲ አሲ ሄ ባሱዋ ቦላ አይቢን ከዲዳኮ ፐርዳ ጋላሰ ታማን ፓጩቲዲ ቆንጫና።
- 14 ኦኒካ ሄ ባሱዋ ቦላ ከዲዳ ከላይ ታማን ፀጌቶና አቲኮ፣ ባ ዋይቱዋ ኤካና።
- 15 ሺን ኦዴ አሶይካ ታማን ፀጌቲኮ፣ ሄ ኡራሰ ዋይቶይ ባዋ። ጊደሺን፣ ኢ ባ ሁዔን ታማፔ ከሲ ኤኪዳ አሳዳ አታና።
- 16 ሂንቲ ያሳ ከሌ ጊዴይሳኔ ያሳ አያናይ ሂንቲናን ዴዔይሳ ኤሬኬቲ?
- 17 ኦኒካ ያሳ ከሌ ላሊኮ፣ ያሳይካ ኢያ ላላና። ያሳ ከላይ ጌሺ፣ ሄ ከላይካ ሂንቲና።
- 18 ኦኒካ ባና ጩዋፎ። ሃ ሳዓ ጩንጫቲላን ባና ጩንጫ ኦሊዲ ኤኪያ ኦኒካ ያሳ ሲንላን ጩንጫ ጊዳናው ኤያ ጊደ።
- 19 ሃ ሳዓ ጩንጫቲላይ ያሳ ሲንላን ኤያቴሌ። ጌሻ ማፃፋን፣ «ያሳይ ጩንጫታ ኤንታ ጌኔ ቆፋን ኦይከሰ» ያጌሰ።
- 20 ቃሲ፣ «ጩንጫታ ቆፋይ ማደናባ ጊዴይሳ ጎዳይ ኤሬሰ» ያጌሰ።
- 21 ሃሳ ጊሾ፣ ኡባይ ሂንቲሳ ጊዲያ ጊሾ ኦኒካ አሳን ጩቁቶፎ።
- 22 ጳሎሎሲ፣ አጲሎሲኔ ጳዲሮሲ፣ ሃ አላሚይ፣ ዴዖይ፣ ሃይቆይ፣ ሃዒ ዴዔይ፣ ሲንላፌ ያናይሲ፣ ኡባይ ሂንቲሳ።
- 23 ሂንቲ ኪሪሰቶሳሳ፣ ኪሪሰቶሲ ያሳሳ።

# 4

## ኪሪሰቶሳ ሃዋሬታ

- 1 አሳይ ኑና ኪሪሰቶሳ አይሌዳኔ ያሳ ፀራ ቆንጩሳናው ሃዳሪ ኢሜቲዳ አሳዳ ኦሊዲ ቆፖ።
- 2 ሄ ሃዳራ ኤኪዳ አሳቲ ባንታ ጎዳሰ አማኔቲዳይሳታ ጊዳናው ቤሴሰ።
- 3 ሺን ሂንቲ ዋይኮ ሃራይ ታና ፐርዲኮ፣ ታው አይኮካ ጊዴና። ሃራይ አቶ፣ ታካ ታ ቦላ ፐርዲኮ።
- 4 ታ ካሃይ ጌሺ፣ ሺን ሄሲ ታ ፖሎ ዲሎ ጊዴይሳ ቤሴና። ታ ቦላ ፐርዳናይ ጎዳ ያላላ።

5 ሄሳ ጊሾ፣ ዋዴይ ጋኮና፣ ጎዳይ ዮና ኦዴ ቦላካ ፐርዶፊቲ። ኢ ጳማን ጌሚዳባ ፖዎ ኬሴና፤ አሳ ዋዛናን ቆሴቲዳ ቆፋ ቆንጨሳና። ሄ ዋዴ ኢሶይ ኢሶይ ያሳፊ ጋላታ ኤካና።

6 ታ ኢሻቶ፣ ሂንቴ ጊሾ አጲሎሳኔ ታና ለሚሶ ኦሳዳ ሂንቴው ኦዳሰ። ሄሳ ታ ኦሲዳይ፣ «ፃፊቲዳይሳፊ አጶፋ» ያጊያ ዘሪያ ሂንቴ ኑፔ ታማራና ማላሳ። ሄሳ ጊሾ፣ ኦኒካ ኢሱዋ ሳቢዲ ሃንኩዋ ካቆናው ቤሴና።

7 ኔ ሃራታፔ አይቢን አቆይ? ኔኒ ኤካቦናባይ አይቢ ዴዒ? ያቲን፣ ኔኒ ኤኪዳባ ሃራ አሳፔ ኤኪዳ ጊዲኮ፣ ኤኪቦና አሳዳ አይሰ ጨቁታይ?

8 ሃዒ ሂንቴ ካሊዴታ። ሃዒ ሂንቴ ዲሬቲዴታ። ኦኒ ባይና ሂንቴ ፃላላ ካዎቲዴታ። ሂንቴ ቱማ ካዎቲዳባ ጊዲያኮ፣ ኦካ ሂንቴራ ካዎታናሺን።

9 ያሳይ ኦና ሃዋሬታ፣ ሃይቆ ፐርዴቲዳ አሳዳ አሳ ኡባፊ ኦና ጉዬ አሊዳ ታው ዳኔሰ። ኦኒ ሃ አላሚያሰ፣ ኪታንቾታሲኔ አሳሰ ካሳባ ጊዲዳ።

10 ኦኒ ኪሪሰቶሳ ጊሾ ኤያ ጊዲዳ፣ ሺን ሂንቴ ኪሪሰቶሳን ጨንጫታ ጊዲዴታ። ኦኒ ዳቡራንቾ፣ ሺን ሂንቴ ሚኖ ጊዲዴታ። ሂንቴ ቦንቼቲዴታ፣ ሺን ኦኒ ቶሼቲዳ።

11 ሃዒ ጋካናው ኦ ኮሻቶሰ፣ ሳሞቶሰ፣ ካሎቶሰ፣ ዋዴቶሰ፤ ዳና ሶ ቆዩዲ ቶይላቶሰ።

12 ኦኒ ኦ ኩሼን ኦሊ አቆሰ። ኦና አሲ ባዲያ ዋዴ አንጀሰ፤ ኦና ጎዲያ ዋዴ ዳንዳያሰ።

13 ኦ ቦላ ኢታባ ኦዴቲያ ዋዴ ሎዎ ቃላ ዛርሰ። ኦ ሃዒ ጋካናው ሃ አላሚያ ፒቶኔ ዋራ ዬጌቲያ ቡሬ ጊዲዳ።

14 ታኒ ሄሳ ፃፊዳይ፣ ታ ሲቂያ ናይታዳ፣ ሂንቴና ዘራናው ፃፋሲፔ አቲን ዬላያናው ጊዴና።

15 ኪሪሰቶሳን ሂንቴና ዲቺያ ታይቦፔ ቦላ ጊዲዳ ካሌጼይሳቲ ዴዒኮካ፣ ሂንቴው ኢሲ አጫ ዴዒሰ። ታ ሂንቴና ኪሪሰቶሰ ዬሱሳ ዋንጌላን ዬላሰ።

16 ሃዛ፣ ሂንቴ ታና ለሚሶ ኦሊዲ ካላና ማላ ሂንቴና ዋሳይሰ።

17 ሄሳ ጊሾ፣ አማኔቲዳ፣ ታ ሲቂያ፣ ጎዳን ታ ናዓ፣ ዪሞቲዮሳ ሂንቴኮ ኪታሰ። ኢ ዲማ ዲማ ቤሳን ዴዒያ ዋሳ ኬላን ታ ታማርሲዳ፣ ኪሪሰቶሳ ዬሱሳን ዴዒያ ታ ኦጊያ ሂንቴና ሃሳዩሳና።

18 ታኒ ሂንቴኮ ዮናባ ዳኒን፣ ኦቶሪያ ኢሲ ኢሲ አሳቲ ዴዎሶና።

19 ሺን ጎዳይ ገከ፡ ማታ ዋዴ ታኒ ሂንቴኮ ባና። ሄ ዋዴ ኦቶራንቸታ ኦዳ ፃላላ ገደናሺን ኤንታ ዋልቃካ ኤራና።

20 ያሳ ካዋቴላይ ኦዳ ገደናሺን ዋልቃ።

21 ታኒ ሂንቴኮ ፃምዓራ ቦዬ ዋይኮ ሲቆራኔ አሽኬ አያናራ ቦ? አዉሳ ደሬቲ?

### 5

አማኒያ አሳ ገደን ዴዒያ ዬላያ ኦሶ

1 ሂንቴ ገደን ላይማቴሌ ዴዒይሲ ዚገራቴሰ። ሄሳ ማላ ላይማቴሌ ሃሪ አቶሺን፡ አማኖና አሳይካ ኦሎኖና። ሂንቴ ገደን ባ አዋ ማቸራ ቱኒዳ አሲ ዴዒሰ።

2 ሄሳን ሂንቴ ቁርታናዉኔ ዬላታናው ቤሴኔ፡ ሺን ኦቶርቲዴታ። ሄሳ ማላ ቦርሶባ ኦሌዳ ኡራ ሂንቴ ገደፌ ኬሳናው ቤሴኔ?

3 ታኒ አሾን ሂንቴራ ደና ኢዲኮካ አያናን ታ ሂንቴራ ዴዒይሰ። ታኒ ሂንቴራ ዴዒያ አሳዳ ሃናዳ ሄሳ ማላ ኦሎጥ ኦሌዳ ኡራ ቦላ ፒርዳሰ።

4 ኑ ጎዳ ዬሱሰ ኪሪሰቶሳ ሱንላን ሂንቴ ሸቂያ ዋዴ ታኒ አያናን ሂንቴራ ዳና። ሄሳን ጎዳ ዬሱሰ ኪሪሰቶሳ ዋልቃይ ሂንቴራ ገዳና።

5 ሄ ኡራ ናጋራ አሾይ \* ቆዩዲ፡ ኢያ አያናይ ጎዳ ዬሱሳ ፒርዳ ጋላሳን አታና ማላ ኢ ፃላሄሰ አፂ አማቶ።

6 ሂንቴ ጨቆይ ሎዎ ገዴና። ጉላ ኢርሾይ ሙኑቃ ኡባ ዴንሌይሳ ኤሪኬቲዬ?

7 ሂንቴ ሃዒ ኢርሾይ ባይና ሙኑቃ ገዳና ማላ፡ ናጋራ ኢርሾዋ ሂንቴፌ ኬሲቴ። ኦሰ ፓሲካ ዶርሳ ገዲዳ ኪሪሰቶሲ ያርሾቴሰ።

8 ሄሳ ገሾ፡ ጌኔይኔ ኢታቴሌ ዴዒያ ኢርሾዋራ ገደናሺን ቱማቴሌኔ ጌሻቴሌ ዴዒያ ኡይላራ ኑ ባሊያ ቦንቸሰ።

9 ታ ካሴ ፃፊዳ ዳብዳቢያን ሂንቴ ላይማቴያ አሳራ ጋሄቶና ማላ ሂንቴው ኦዳሰ።

10 ሄሳ ጉሳይ ሃ አላሚያን ዴዒያ ላይማቴይሳታራ ዋይኮ ኡዜታራ ዋይኮ ካይሶታራ ዋይኮ ኤቃ ጎይኔይሳታራ ፖሎ ጋሄቶፊቲ ጉሱ ገዴና። ሄሳ ገዲኮ፡ ሃ አላሚያፕ ሂንቴ ኬያናው ቤሴሰ ሺን አቲሰ።

---

5:1 ዛሬ 22:30 \* 5:5 ናጋራ አሾይ፡ ናጋራ ሜዶይ ዋይኮ ናጋራ አሳቴላይ።  
5:6 ጋላ 5:9 5:7 ኬሳ 12:5 5:8 ኬሳ 13:7፤ ዛሬ 16:3



11 ሺን አማናይሰ ያጊሼ ላይማቴይሳታራ ዋይኮ ኡዜታራ ዋይኮ ኤቃ ጎይኔይሳታራ ዋይኮ ጫዬይሳታራ ዋይኮ ማላቴይሳታራ ዋይኮ ካይሶታራ ጋሄቶፊቴ ጋዳ ሂንቴው ኦዳይሰ። ሄሳ ሜላ አሳራ ሃሪ አቶሺን፣ ካሊካ ሞፒቴ።

12 ዋሳ ከላፌ ካሬራ ዴዔይሳታ ቦላ ፒርዳናው ታና አይቤ ጋሌይ? ዋሳ ከላን ዴዔይሳታ ቦላ ሂንቴ ፒርዳኬቴዬ?

13 ሺን ካሬራ ዴዔይሳታ ቦላ ያሳይ ፒርዳና። ሄ ኢታባ ኦሊያ ኡራ ሂንቴ ጊዶፊ ኬሲቴ።

# 6

## አማኒያ አሳ ጊዶን ዴዔያ ሞቶ

1 ሂንቴ ጊዶፊ ኢሶይ ኢሱዋራ ሞቶይ ዴዔኮ፣ ሄሳ አማኒያ አሳ ሲንላን ፒርዳታናይሳ አጊዲ አማናና አሳ ሲንላን ፒርዳታናው ዋኒዲ ቢ?

2 ጌሻቴ አላሚያ ቦላ ፒርዳናይሳ ሂንቴ ኤሬኬቴ? ያቴን፣ ሂንቴ አላሚያ ቦላ ፒርዳያባ ጊዲኮ፣ ሃይሳ ሜላ ጉላባ ፒርዳናው ዋኒዲ ዳንዳዔኬቴ?

3 ኮኒ ከታንቾታ ቦላ ፒርዳናይሳ ኤሬኬቴ? ያቴን፣ ሃ ሳዓ ዲሳባ ቦላ ፒርዳናይሰ ሂንቴና ዋኒዲ ያኒ?

4 ያቴን፣ ሄሳ ሜላ ሜቶይ ሂንቴ ጊዶን ሜዴቴኮ፣ ዋሳ ከላ አይፊን ካዴቴዳ አሳ ሲንላን ፒርዳታናው ዋቴ ኤፊቴ?

5 ታኒ ሂንቴና ዬላያናው ሄሳ ጋይሰ። ሂንቴ ጊዶን ካጩቴዳ አሳታ ሲጌላናው ዳንዳዔያ አኬካ አሲ ባዌ?

6 ያቴን፣ ኢሲ አማኔይሰ ሃንኮ አማኔይሳ ፒርዳ ከላን አማናና አሳ ሲንላን ሞታናው ቤሲ?

7 ሂዛ፣ ሂንቴ ኢሶይ ኢሱዋ ሞቴያባ ጊዲኮ ሂሲ ሂንቴ ኩንዴላ ቤሴሰ። ሄሳፊ ሂንቴ ቆሄቴኮኔ ጨሜቴኮ ኬሄኔ?

8 ሺን ሂንቴ ዋሊ ጊዶን አማኔይሳቴ ኢሶይ ኢሱዋ ቆሄታኔ ጨሜታ።

9 ጌላቴ ያሳ ካዎቴላ ላቶናይሳ ሂንቴ ኤሬኬቴ? ሂንቴና ጨሞፊቴ፤ ላይማቴይሳቴ ዋይኮ ኤቃ ጎይኔይሳቴ ዋይኮ ቃይዔይሳቴ ዋይኮ አዴራ አዴራ ጋሄቴይሳቴ።

10 ዋይኮ ካይሶቴ ዋይኮ ኡዜቴ ዋይኮ ማላቴይሳቴ ዋይኮ ጫዬይሳቴ ዋይኮ ቦንቄይሳቴ ያሳ ካዎቴላ ላቶኮና።

11 ሂንቴፌ ኢሲ ኢሲ አሳቲ ካሴ ሄሳ ማላ። ሺን ሂንቴ ሃዒ ጎዳ ዩሱስ ኪሪሰቶሳ ሱንጻኒኔ ያሳ አያናን ማጩቲዳታ፤ ጌዬዳታ፤ ዒሊዳታ።

**ሂንቴ አሳቴላን ያሳ ቦንቺቲ**

12 ሂንቴ፣ «ኑ ኮዬዳባ ኦላናው ዳንዳዖስ» ያጌታ። ሺን ኡባይ ሂንቴና ማዴና። ታኒ ኮዬዳባ ኡባ ኦላናው ዳንዳዓይሰ። ሺን አይቢካ ታና ሃሬና።

13 ሂንቴ፣ «ካሊ ኡሎሳ፤ ኡሎይካ ካላሳ» ያጌታ። ሺን ያሳይ ኡሎዋካ ካላካ ቆይሳናይሳ ታ ሂንቴው ኦዳይሰ። ኑ አሳቴላይ ጎዳሳፌ አቲን ላይማቴላሳ ጊዴና። ጎዳይካ ኑ አሳቴላሳ።

14 ያሳይ ጎዳ ሃይቆፔ ዴንሊዳይሳዳ፣ ኑናካ ሃይቆፔ ባ ዎልቃን ዴንላና።

15 ሂንቴ አሳቴላይ ኪሪሰቶሳ አሳቴላፌ ባጋ ጊዴይሳ ኤሬኬቲ? ያቲን፣ ታኒ ኪሪሰቶሳ አሳቴላፌ ባጋ ኤፋዳ ላይማቴላ አሳቴላ ጊዳና ማላ ኦላ? ሃኔና!

16 ላይማቴያ ኡራይ ኢ ጋሄቲያ አሴራ ኢሲ አሳቴላ ጊዴይሳ ኤሬኬቲ? ጌሻ ማፃፋን፣ «ኤንቲ ናሞዓይ ኢሲ አሳቴላ ጊዳና» ጌቲቲዲ ፃፊቲሰ።

17 ሺን ጎዳራ ኢሲፊያ ኡራይ ኢያራ አያናን ኢሶ ጊዴሰ።

18 ላይማቴላፌ ሃኪቴ። ኢሲ ኡራይ ኦሊያ ሃራ ናጋራይ ኢያ አሳቴላፌ ካሬራ ኦሴቴሰ። ሺን ላይማቴያ አሲ ባ አሳቴላ ቦላ ናጋራ ኦሴሰ።

19 ሂንቴ አሳቴላይ ያሳይ ሂንቴው ኢሚዳ ሂንቴናን ዴዒያ ጌሻ አያና ኬሊ ጊዴይሳ ኤሬኬቲ? ሂንቴ ሂንቴባ ጊዴኬታ።

20 ያሳይ ሂንቴና ጋቲን ሻሚሰ። ሄሳ ጊሾ፣ ሂንቴ አሳቴላን ያሳ ቦንቺቲ።

# 7

**ኤኮ ጌሎባ**

1 ሂንቴ ታው ፃፊዳ ዳብዳቢያሰ ዛሮይ ሃይሳ። ኢሲ አሲ ማቾና ዴዒኮ ሎዖ።

2 ሺን ላይማቴላፌ አታናው ኢሲ ኢሲ አዳይ ማቾ ኤኮ፤ ቃሲ ኢሲ ኢሲ ማጫሳሰ አዚኒ ዴዖ።

3 አዚናይ ባ ማቺሰ፣ ቃሲ ማቺያ ባ አዚናሰ ቤሲያባ ኩንሉ።

4 ማቼሰ ባ አሳቴላ ቦላ ኢው ማቲ ባዋ፣ ሺን ማታይ ኢ አዚናሳ። ሄሳዳካ፣ አዚናሰ ኢያ አሳቴላ ቦላ ማቲ ባዋ፣ ሺን ማታይ ማቼሳ።

5 ሂንቲ ዋሳን ጉላ ዋዴ ጋምዓናው ዘሬቴላን ጊደና ኢዲኮ፣ ኢሶይ ኢሱዋ ዲጎሬቴ። ሄሳ ጋሶን ሂንቲናቴላ ሃራናው ያኔቴን፣ ፃላሄይ ሂንቲና ፓጮና ሜላ ኢሲፌ ዴዒቴ።

6 ሺን ታኒ ሂንቲና ዘራናው ሃይሳ ጋይሲፔ ኣቲን ኪታ ጊዴና።

7 ኣሲ ኡባይ ታዳ ማቸ ኤኮና ዴዒያኮ ደሳይሰ፣ ሺን ያሳይ ኢሱዋሰ ኢሱዋሰ አሚዳ ዲማ አሞቲ ዴዒሰ። ኢሱዋሰ ሃይሳ ሜላ ሃንኩዋሰ ሄሳ ሜላ አሞቲ ዴዒሰ።

8 ማቸ ኤኪቦናይሳታሲኔ አዚና ጌሊቦናይሳታሰ ቃሲ ኣምዔታሰ ታኒ ጌይ፣ ታዳ ኤኮና ዋይኮ ጌሎና ዴዒቴ ጋዳ ዘራይሰ።

9 ሺን ኣሞን ፀጌቴይሳፌ ኤኬይሲኔ ጌሌይሲ ሎዖ ጊዲያ ጊሾ ኤንቲ ባንታና ሃራናው ዳንዳዖና ኢዲኮ፣ ኤኮኔ ጌሎ።

10 ታኒ ኤኪዳይሳታኔ ጌሊዳይሳታ ሃይሳዳ ጋዳ ዘራይሰ፤ ታና ጊዲኬ ጎዳይ ኪቴሰ፤ ማቼያ ባ አዚናፔ ሻኬቶፎ።

11 ሺን ሻኬቲኮ ሃራ አዚና ጌሎና ባርካ ዴዖ ዋይኮ ባ አዚናራ ጊን። አዚናይ ባ ማቼው ቢሎፎ።

12 ሺን ሃራታሰ ጎዳ ጊደናሺን ታኒ ሃይሳዳ ጋይሰ። ኣማኖና ማቸ ዴዒያ ኣማኒያ አዚኒ ዴዒኮ፣ ኢያ ማቼያ ኢያራ ኢሲፌ ዳናው ኮይኮ ኢዮ ቢሎፎ።

13 ቃሲ ኣማኖና አዚኒ ዴዒያ ኣማኒያ ማቸ ዴዒኮ፣ ኢ አዚናይ ኢራ ኢሲፌ ዳናው ኮይኮ ኢያፔ ቢሎቶፎ።

14 ኣማኖና አዚናይ ባ ኣማኒያ ማቼ ባጋራ ጌዬሰ፤ ቃሲ ኣማኖና ማቼያ ባ ኣማኒያ አዚና ባጋራ ጌያዉሱ። ሄሲ ባይኔኮ፣ ሂንቲናይቲ ቱና ጊደሶና፣ ሺን ሃዒ ኤንቲ ጌሺ።

15 ሺን ኣማኖና አዚናይ ዋይኮ ማቼያ ቢላናው ኮይኮ ቢሎ። ኣማኒያ ማቼያ ዋይኮ አዚናይ ሄሳ ሜላባን ቃሺቶኮና። ያሳይ ኑና ሳርቴላን ዳና ሜላ ያጊሰ።

16 ኣማኒያ ማቼቴ፣ ኔኒ ኣማኖና ኔ አዚና አሻኔኮ ኣይ ኤራይ? ዋይኮ ኣማኒያ አዚናው፣ ኔኒ ኣማኖና ኔ ማቼው አሻኔኮ ኣይ ኤራይ?

**ያሳይ ሂንቲና ያጊዳይሳዳ ዴዒቴ**

17 ኢሲ ኢሲ ኣሲ ጎዳይ ኢያው ኢሚዳ ኢሞታዳኔ ያሳይ ኢያ ያጊዳይሳዳ ዴዖ። ዋሳ ኬላ ኡባን ታኒ ታማርሲዳ ዋጋይ ሃይሳ።

7:10 ማቶ 5:32፤ 19:9፤ ማር 10:11-12፤ ሉቃ 16:18

18 እነካ ቃፃሬቲዲ አማኒዳባ ጊዲኮ፡ ቃፃሬቶናዳ ሃኖፖ።  
ቃፃሬቶና አማኒዳ እነካ ዳዲኮ፡ ቃፃሬታናው ኮኖፖ።

19 ያሳ ኪታ ፖላናው ቤሴሰፔ ኣቲን ቃፃሬቲን ቃፃሬቶና ኣጊን  
ኣይኮካ ማዳና።

20 ኢሲ ኢሲ ኣሲ ያሳይ ባና ፃጊያ ዎዴ ዴዔይሳዳ ዴዎ።

21 ያሳይ ኔና ፃጊያ ዎዴ ኔኒ ኣይሌ? ኣይኮይ ባዋ ሄሳሰ  
ኡንዔቶፋ። ሺን ኔኒ ኣይሌቴላፌ ላዓ ኬያናው ዳንዳዒኮ ዩዳ  
ኬያ።

22 ኣይሌ ጊዲ ዳዒሼ ጎዳን ፃጌቲዳ ኣሲ ጎዳን ኣይሌቴላፌ  
ላዓ ኬዩሰ። ሄሳዳካ፡ ኣይሌ ጊደና ዳዒሼ፡ ጎዳን ፃጌቲዳ ኣሲ  
ኪሪሰቶሳ ኣይሌ።

23 ያሳይ ሂንቴና ጋቲን ሻሚዳ ጊሾ ኣሳ ኣይሌ ጊደፒቴ።

24 ታ ኢሻቶ፡ ሂንቴ ኢሶይ ኢሶይ ፃጌቲያ ዎዴ ዳዒያ ዴዑዋን  
ያሳራ ኢሲፌ ዳዒቴ።

**ኤኪቦና፡ ጌሊቦና ኣሳባኔ ኣምዔታባ**

25 ጌላዎታባ ጎዳይ ታና ከቲዳባይ ባዋ። ሺን ጎዳይ ታው  
ኢሚዳ ማሮቴላ ማላ ታኒ ሂንቴና ዘራይሰ።

26 ሂዛ፡ ሃዒ ማቴዋ ጊሾ ኤኮና ዎይኮ ጌሎና ዱሲ ታው  
ሎዎ ዳኔሰ።

27 ኔ ማሾ ኤኪዳባ ጊዲኮ፡ ቢላናው ኮኖፓ። ኔ ማሾ ኤካቦናባ  
ጊዲኮ፡ ኤካናው ኮኖፓ።

28 ሺን ኔ ማሾ ኤኪኮ ናጋሪ ባዋ። ሄሳዳ ጌላዒያካ ኣዚና  
ጌሊኮ ናጋሪ ባዋ። ሺን ኤኪያ ጌሊያ ኣሳሰ ሃ ሳዓን ዳሮ ማቶይ  
ዳዒያ ጊሾ ሂንቴ ሄሳፌ ኣታና ማላ ታ ኮያይሰ።

29 ታ ኢሻቶ፡ ታ ጌይ ሄሳ፤ ዎዴይ ዉሪሰ። ሂዛፔ ሲንጼ ማቻ  
ዴዔይሲ ማሾ ኤኮናይሳዳ ዴዎ።

30 ዩኬይሳቲ ዩኮናዳ፡ ኡፋይቴይሳቲ ኡፋይቶናዳ፡ ሻሚይሳቲ  
ኣይኮይካ ባይናዳ ባንታና ታይሰ።

31 ሃ ሳዓ ሻሉዋን ማዴቴይሳቲ ማዴቲቦናዳ ሃኖ። ሃ ኣላሚያ  
ማላይ ኣፋና።

32 ሂንቴ ሂርጊ ባይና ዳና ማላ ታ ደሳይሰ። ማሾ ኤኪቦናይሲ  
ጎዳ ኡፋይሳናው ኮያ ጊሾ ጎዳባ ቆፔሰ።

33 ሺን ማሾ ኤኪዳይሲ ባ ማቺው ኡፋይሳናው ኮያ ጊሾ ሃ  
ሳዓባ ቆፔሰ።

34 ኢያ ቆፋይ ናምዓን ሻኬቴሰ። ኣዚና ጌላቦና ጌላዒያ ባ  
ኣሳቴላኔ ባ ሺምፑዋን ጌያዳ ጎዳ ኡፋይሳናው ኮያ ጊሾ ጎዳባ

ቆጥረው:: ሺን አዚና ጌሊዳራ ባ አዚና ኡፋይሳናው ኮያ ጊሾ ሳባባ ቆጥረው::

35 ታኒ ሄሳ ሂንቲው ኦዳይ፣ ሂንቲ ማዳታና ማላሳፌ አቲን ሂንቲና ኡንዔላናው ጊዳና:: ሺን ሂንቲ ቆፋይ ሻኬቶና ማራን ደዒዲ ጎዳ ኡፋይሲያባ ሂንቲ ኦላና ማላ ታኒ ኦዳይሰ::

36 ኦኒካ ባ ኦይቺዳ ጌላዔሰ ጌሎ ዋዳይ አጂሰ ጊዲ ኢዮ አጋናው ቆጥኮ፣ ሄሲ ቃሲ ኢው ሎዖ ጊዳናይሲ ኢያው ሲዔቲኮ፣ ባ ኮዩዳይሳ ኦላ፣ ኤንቲ ኤኬቶ፣ ጌሎቶ፣ ሄሳን ናጋሪ ባዋ::

37 ሺን ኢሲ አሲ ኡንዔሊያባይ ቆዩን፣ ባ ዋዛናን ማኒዲ፣ ባና ሃሪዲ፣ ባ ኦይቺዳ ጌላዒው ኤኮና አጋናው ኮይኮ ሎይሊሰ::

38 ሄሳ ጊሾ፣ ጌላዒው ኤኪያ ኡራይ ሎይሊሰ፣ ቃሲ ኤኮና ኡራይ ዳር ሎይሊሰ::

39 ማቺያ ባ አዚናይ ገፃ ደዒያ ዋዳ ኡባን ኢያራ ቃሼታሱ:: ሺን ኢ አዚናይ ሃይቁኮ፣ ባ ደሲዳ አዚና ጌላናው ዳንዳዓዉሱ:: ጊዳሺን፣ ኢያ ጌሊያ አዳይ አማኒያ አሲ ጊዳናው ቤሴሰ::

40 ታ ቆፋን ጊዲኮ፣ ኢያ ጌሎና ዳዒኮ ኡፋይሳን ዳና:: ቃሲ ታው፣ ታ ቦላ ዖሳ እያኒ ደዒያ ዳኔሰ::

# 8

## ኤቃሰ ያርሼቲዳ ካላባ

1 ኤቃሰ ያርሼቲያ ካላባ ጊዲኮ ኑ ኡባይ ኤርሰ:: ኤራቴሊ ኡቶርሴሰ፣ ሺን ሲቆይ ዲቺሰ::

2 ኦኒካ ባና ኤራይሰ ጊዲ ቆጥኮ፣ ኢ ቡር ኤራናው ቤሴይሳ ኤሪቤና::

3 ሺን ኦኒካ ዖሳ ሲቁኮ ኢ ዖሳ ማታን ኤሬቲዳይሳ::

4 ሄሳ ጊሾ፣ ኤቃሰ ያርሼቲዳ ካሊ ሙሳባ ጊዲኮ ሃ አላሚያን ጎዲ ኢሲ ዖሳፌ አቲን ሃሪ ባይና ጊሾ ኤቁ ገላናባ ጊዳይሳ ኑኒ ኤርሰ::

5 ዖሴ ጊዳናሺን ሳሎኒኔ ሳባን ዖሴ ጌቴቲ ያጌቲያ ዳር ዖሳቲኔ ጎዳቲ ዳዒኮካ፣

6 ኡባባ ማጂዳ፣ ኑ ኢያባ ጊዲዳ፣ ኢሲ ዖሳይ፣ አዋይ፣ ኑሰ ዳዔሰ:: ኡባይ ኢያ ባጋራ ማጂቲዳ፣ ኑካ ኢያ ባጋራ ዳዖ ዳሚዳ ኢሲ ጎዳይ፣ ዩሱሰ ኪሪሰቶሲ ኑሰ ዳዔሰ::

7 ሺን ሃይሳ ኤሬይ ኡባ ጊዳና:: ኢሲ ኢሲ አሳይ ኤቃ ጎይሮራ ማዘቲዳ ጊሾ ካሊ ሚያ ዋዳ ኤቃሰ ያርሼቲዳባ ኦሊዲ ኤኮሶና:: ሄ ዋዳ ኤንታ ካሃይ ዳቡራ ጊዲያ ጊሾ ቱኔሰ::

8 ሺን ካሌ ኑና ያሳራ ዳቦዬና። ኑ ሞና አገዲ አይኮካ ቆሃቶኮ፤ ቃሲ ሚዲ ዲማ ጎዔቶኮ።

9 ሺን ሂንቴ ኮዱዳባ ማናው ላዓቴሌ ሂንቴው ዳዒኮካ ሄሲ አማኖን ሚኖናይሳታ ቆቦና ሜላ ናጌቴቴ።

10 ኔኒ ኔና ኤራንቾ ጋዳ ኤቃሰ ያርሼቴዳ ካሌ ማናው ኤቃ ኬላን ኡቴዳሺን፣ አማኖን ሚኖናይሲ ኔና ቤዒኮ ሄሲ ኢያ ኤቃሰ ያርሼቴዳ ካሌ ማና ሜላ ዳንጴጴኔዬ?

11 ሂዛ፣ ኔ ኤራቴላ ጋሶን ኪሪሰቶሲ ኢያ ጊሾ ሃይቂዳ፣ አማኖን ሚኖና ኔ አሻይ፣ ቆይሰ።

12 ሄሳዳ ኦሊዲ፣ አማኖን ሚኖና ሂንቴ አሻታ ቆሂሼኔ ኤንታ ካሃ ማዲንጂሲሼ ኪሪሰቶሳ ቆሃታ።

13 ሄሳ ጊሾ፣ ካሌ ታ አሻ ቆቢያባ ጊዲኮ፣ ኢ ቆቤቶና ሜላ አሾ ኡባራካ ሚኬ።

# 9

## ሃዋሪታ ማታ

1 ታኒ ዬዳ ዳዒያ አሲ ጊዲኪና? ታ ሃዋሪ ጊዲኪና? ታኒ ኑ ጎዳ ዬሱሰ ኪሪሰቶሳ ቤዓቢኪና? ሂንቴ ጎዳን ታ ዳቡራ አይፌ ጊዳኬቴ?

2 ሂንቴ ጎዳባ ጊዲያ ጊሾ ታ ሃራታሰ ሃዋሪ ጊዳና ኢጂኮካ፣ ሂንቴው ሃዋሪ ጊዳይሳሰ ሂንቴ ማርካ።

3 ታና ሃዋሪ ጊዳና ጌይሳታሰ ታ አሚያ ዛርይ ሃይሳ።

4 ኑ ሂንቴፌ ማናዉኔ ኡያናው ቱማ ኑሰ ማቲ ባዌ?

5 ሃንኮ ሃዋሪታዳ፣ ጎዳ አሻታዳኔ ጳዒርሳዳ፣ አማኖን ኑ ማቼታ ኤኪ ሃሙታናው ኑሰ ማቲ ባዌ?

6 ዋይኮ ኦሊዲ ማናው ቤሴይ ታራኔ ባርናባሳ ፃላሌ?

7 ባ ሚሼን ዋታዳሬታሌ ኦሊይ ኦኔ? ዋይኮ ዋይኔ ቶኪዲ፣ ኢያፔ አይፌ ሞናይ ኦኔ? ዋይኮ ዉዴ ሃሚሼ፣ ሄ ዉዲያፔ ማሌ ኡዮናይ ኦኔ?

8 ታኒ ሄሳ አሳ ቆፋላ ጋይናዬ? ሂጌይ ሄሳ ጌኔ?

9 ሙሴ ሂጊያን፣ «ዉዲማን ካላ ዬዲያ ቦራ ደና ቃቾፋ» ጌቴቴዲ ፃፊቴሰ። ያቲን ያሳይ ሄሳ ቦራሰ ቆፒዲ ጊዳ?

10 ያሳይ ሄሳ ጊዳይ ኑሰ ቆፒዲ ጊዳኔ? ኤ ኑ ጊሾሳ። ጎዬይሲካ፣ ካላ ጌሼይሲካ ባና ጋኬይሳ ኤካና ጊዲ ኡፋይሳን ኦላናው ቤሴሰ ጌቴቴዲ ቱማ ኑ ጊሾ ፃፊቴሰ።

9:9 ዛሬ 25:4፤ 1፻፵ 5:18

11 ኑኒ ሂንቴ ጊደን አያና ዜሬሌ ዜሪዳ ጊዲኮ አሾስ ኮሺያባ ኑ ሂንቴሬ ኤኪኮ፣ ሄሲ ጊታባዬ?

12 ሃራቲ ሄሳ ሂንቴሬ ኤካናው ኤንታው ማቲ ዳዒኮ፣ ኑስ ኤንታይሳሬ አጂያ ማቲ ዳዒስ።

ሺን ኑኒ ከሪስቶሳ ዋንጌላስ ጴቤ ጊደና ማላ፣ ኡባ ጌንጮሲፔ አቲን ሄ ማታን ጎዔቲቦኮ።

13 ያሳ ኬላን ኦሊያ አሳቲ ባንታ ካላ ያሳ ኬላሬ ኤኬይሳ ኤሬኬቲ? ቃሲ ያርሾ ቤሳን ኦሌይሳቲ ያርሹዋሬ ኤኬይሳ ኤሬኬቲ?

14 ሄሳዳካ፣ ዋንጌላ ማርካቴይሳቲ ዳሳስ ኮሺያባ ዋንጌላፔ ኤካና ማላ ጎዳይ ከቲስ።

15 ሺን ታኒ ሃ ማታ ኡባን አይኮካ ጎዔታቢኬ። ታኒ ሃይሳ ያፊዳይ ታ ማታ ቦንቲሳናው ኮያዳ ጊዴና። ኦኒካ ታ ጩቁዋ ሃዳ ኦላናፔ ሃይቆይ ታው ሎዎ።

16 ታኒ ዋንጌላ ኦዳይ ከቲቲዳ ጊሾሳሬ አቲን ታና ጩቂሲያባ ጊዴና። ዋንጌላ ኦደና ኢጂኮ፣ ታና አዬ።

17 ታኒ ዋንጌላ ደሳዳ ሳባኪኮ ታው ዋይቶይ ዳዒስ። ሺን ታኒ ዋንጌላ ደሶና ከቲታዳ ሳባኪያባ ጊዲኮ ሄሳ ያሳይ ታው ሃዳራ አሚስ።

18 ያቲን፣ ታ ዋይቶይ አይቤ? ታኒ ዋንጌላ ሳባኪያ ዋዳ ታ ማታን ጎዔቶና ዋንጌላ ጮ ሳባኬይሲ ታው ዋይቶ።

19 ታኒ ኦዳስካ አይሌ ጊዲኬ፣ ሺን ዳርታ አሻናው ኡባስ አይሌ ጊዳስ።

20 ታኒ አይሁዳታ አሻናው ኤንታራ ኤንታ ጊዳስ። ታ ሁዔን ሂጌሬ ጋርሳን ዳዒኬ፣ ሺን ሂጌሬ ጋርሳን ዳዒይሳታ አሻናው ሂጌሬ ጋርሳን ዳዒያ አሲ ጊዳስ።

21 ያሳ ሂጊያሬ ካሬ ኬዮና፣ ከሪስቶሳ ሂጊያስ ከቲታሹ፣ ሂጌይ ባይናይሳታ አሻናው ሂጌይ ባይና አሳዳ ጊዳስ።

22 ታኒ ዳቡራንቾታ አሻናው ዳቡራንቾ ጊዳስ። ታኒ ጉላታ አሻናው ኡባራ ኡባ ሃናስ።

23 ታኒ ዋንጌላ አንጂዋ ሻኬታናው፣ ሃ ኡባ ዋንጌላ ጊሾ ሃናስ።

24 ዋላን ጋዴቲያ ኡባይ ዋዒስ፣ ሺን ኢሱዋ ያላሊ ዋይቶ ኤኬይሳ ኤሬኬቲ? ሄሳዳ ሂንቴካ ዋይቲዋ ኤካናው ዋዒቲ።

25 ጋዴቲያ አሳ ኡባይ ኡባባን ባንታና ሃራሰ። ኤንቲ ሄሳ ዳቡሬይ ቋያ ካላቻ ዋይቶ ኤካናሳ። ሺን ኑኒ ዳቡሬይ ሜሪና ካላቻ ዋይቱዋ ኤካናሳ።

26 ሄሳ ጊሾ፣ ታኒ ቆፊ ባይና አሳዳ ዋዲኬ። ጫርኮ ዪምፒያ አሳዳ ጮ ኩሼ ዬዲኬ።

27 ሺን ታኒ ሃራታሰ ዋንጌላ ሳባኪዳፔ ጉዬ ታ ሁዔን ዬጌቲዳ አሲ ጊደና ሜላ ታ አሳቴላ ዋልቃን ሃራዳ ታው ኪቴታና ሜላ ኦሳይሰ።

# 10

## ኤቃ ጎይኖፊቲ

1 ታ ኢሻቶ፣ ታኒ ሂንቲ ሃይሳ አኬካና ሜላ ኮያይሰ። ኑ አዋቲ ኡባይ ቫራፔ ጋርሳራ ሃሙቲዶሶና፤ ኡባይ አባ ፒኒዶሶና።

2 ኤንቲ ሙሴራ ኢሲፋናው ቫራኒኔ አባን ፃማቂቲዶሶና።

3 ኤንቲ ኡባይ ኢሲ አያና ካላ ሚዶሶና።

4 ቃሲ ኡባይ ኢሲ አያና ኡሻ ኡዪዶሶና። ኤንቲ ባንታና ካሊያ አያና ዛላፊ ፑልቲዳ ኡሻ ኡዪዶሶና፤ ሄ ዛላይካ ኪሪሰቶሳ።

5 ሺን ያሳይ ኤንታፊ ዳርታን ኡፋይቲቦና ጊሾ ኤንታ አሃይ ባዘ ቢታን ዋዲዲ አቲሰ።

6 ኤንቲ ኢታባ አሞቲዳይሳዳ፣ ኑካ ኢታባ አሞቶና ሜላ ሄሲ ኡባይ ኑሰ ለሚሶ ጊዲሰ።

7 ጌሻ ማፃፋን፣ «አሳይ ማናዉኔ ኡያናው ኡቲዶሶና፤ ቃሲ ዬፃናው ዳንዲዶሶና» ጌቲቲዳይሳዳ ኤንታፊ ኢሶቲ ኢሶቲ ኤቃ ጎይኒዳይሳ ሜላ ሂንቲ ኤቃ ጎይኖፊቲ።

8 ኤንታፊ ኢሶቲ ኢሶቲ ላይማቲዳይሳዳ ኑ ላይማታናው ቤሴና። ሄሳ ጋሶን ኤንታፊ ኢሲ ጋላሰ ላታማኔ ሄቩ ሙኩሉ አሲ ሃይቂሰ።

9 ኤንታፊ ኢሶቲ ኢሶቲ ጎዳ ፓጪዲ ሾሻን ዲኬቲዲ ሃይቂዳይሳዳ ኑ ጎዳ ፓጫናው ቤሴና።

10 ኤንታፊ ኢሶቲ ኢሶቲ ዙዙሚዲ ሃይቆ ኤሄያ ኪታንቹዋን ቋዪዳይሳዳ ሂንቲካ ዙዙዎፊቲ።

---

10:1 ኬሳ 13:21-22፤ 14:22-29    10:3 ኬሳ 16:35    10:4 ኬሳ 17:6፤ ታይ 20:11    10:5 ታይ 14:29-30    10:6 ታይ 11:4    10:7 ኬሳ 32:6  
10:8 ታይ 25:1-18    10:9 ታይ 21:5-6    10:10 ታይ 16:41-49



11 ሃ ኤንታ ቦላ ጋኪዳ ኡባይ ኑ ናጌታና ማላ ኑስ ሌሚሶ ጊዲስ። ቃሲ ዋዴ ወርሴላ ቦላ ዳዲያ ኑስ ቲሚርቲ ጊዳና ማላ ሃ ኡባይ ፃፊቲስ።

12 ሄሳ ጊሾ፣ ታ ኤቃሰ ጊያ ኦኒካ ኩንደና ማላ ባና ናጎ።

13 ኣሴ ኡባ ጋኪያ ፓጩፔ ኣቲን ዲማ ፓጩይ ሂንቲና ጋኪቤና። ሂንቲ ዋልቃይ ዳንዳዔይሳፊ ኣቋያ ፓጩን ሂንቲ ፓጩቶና ማላ ኣሊ ኣሞና ፆሳይ ኣማኔቲዳይሳ። ሂንቲና ፓጩይ ጋኪያ ዋዴ ሄ ፓጩያ ኢ ሂንቲና ዳንዳዒሳና። ቃሲ ሄ ፓጩያፔ ሂንቲ ኬያና ኦጊያ ኢ ገሊሳና።

14 ሂዛ፣ ታ ኣልፆ ኣሻቶ፣ ኤቃ ጎይኖፊ ሃኪቲ።

15 ሂንቲ ዋዛናማ ኣሲ ጊዲዳ ጊሾ ታ ሃይሳ ኦዳይስ። ታኒ ጌይሲ ቱማ ጊዳይሳ ሂንቲ ሂንቲ ሁዔን ፐርዲቲ።

16 ኦኒ ፆሳ ጋላቲዲ ሻኬቲያ ኣንጅ ፀዓይ ኪሪሰቶሳ ሱላራ ኢሲፊቲሊ ዳዔይሳ ጊዳኔይ? ቃሲ ኦኒ ባሊያ ኡይላይ ኪሪሰቶሳ ኣሹዋራ ኢሲፊቲሊ ዳዔይሳ ጊዳኔይ?

17 ኦኒ ዳር ጊዲኮካ ኡይላይ ኢሲኖ፣ ኦ ሄ ኢሲ ኡይላ ሻኬቲያ ጊሾ ኢሲ ኣሳቲሊ።

18 ኣኔ ኢሲራዔሌ ኣሳይ ኦሊዳይሳ ኣኬኪቲ። ያርሼቲዳ ያርሹዋ ማይሳታስ ያርሹ ቤሳራ ኢሲፊቲሊ ባዌዬ?

19 ታኒ ኣይ ጋናው ኮያዳ ጋይና? ኤቃሰ ያርሼቲዳ ካላይ ዋይኮ ኤቃይ ፓሊያባ ጊዳና።

20 ኤንቲ ያርሼይ ፆሳስ ጊዳናሺን ቱና ኣያናታሳ። ሄሳ ጊሾ፣ ሂንቲው ቱና ኣያናታራ ኢሲፊቲሊ ዳና ማላ ኮዩኬ።

21 ሂንቲ ጎዳ ፀዓፔ ኡዩሼ፣ ቃሲ ቱና ኣያናታ ፀዓፔ ኡያናው ዳንዳዔኬታ። ጎዳ ጋይታፔ ሚሼ ቃሲ ቱና ኣያናታ ጋይታፔ ማናው ዳንዳዔኬታ።

22 ኦ ሄሳ ኦሊዲ ጎዳ ዩሎይኖ? ኦ ኢያፔ ኣቋያ ሚኖዬ?

23 ሂንቲ፣ «ኡባባ ኦሶና ማላ ዲጊያባይ ባዋ» ጌታ፣ ሺን ኡባይ ማዳና። ሂንቲ፣ «ኡባባ ኦሶና ማላ ዲጊያባይ ባዋ» ጌታ፣ ሺን ኡባባይ ዲቹና።

24 ኢሲ ኢሲ ኣሲ፣ ሃራ ኣሲ ማዲያባ ቆፓናው ቤሴሲፔ ኣቲን ባና ማዲያባ ፃላላ ቆፖፎ።

25 ሂንቲ ካሃ ሲጴን ጌልሲያ ኦይሻ ዳንሶና ጊያን ባይዜቲያ ኣሹዋ ጮ ሚቲ።

---

10:16 ማቶ 26:26-28፤ ማር 14:22-24፤ ሉቃ 22:19-20      10:18 ሉዌ 7:6  
10:20 ዛሬ 32:17      10:22 ዛሬ 32:21      10:23 1ቆር 6:12

26 አይስ ጊኮ፡ «ሳዒኔ ሳዓን ዳዒያ ኡባይ ጎዳሳ።»  
 27 ኢሲ አማኖና ኢሲ ሂንቴና አማታናው ኮዪዲ ዪጊኮ ባናው ኮይኮ ቢቴ። ሂንቴ ካሃን ሜዴቲያ ኦይሻን ሲዶና ሂንቴ ሲንሌ አሊያባ ኡባ ሚቴ።  
 28 ሺን ኢሲ ኢሲ፡ «ሃይሲ ኤቃስ ያርሼቲዳባ» ጊኮ፡ ሄ ሂንቴው ኦዲዳ አዲያ ጊሾኔ ሂንቴ ካሃ ጊሾ ሄ ካሳ ሞፒቴ።  
 29 ታኒ፡ ካሃ ጊሾ ጌይ ሄ ሂንቴው ኦዲዳ ኡራ ካሃ ጉሱፌ አቲን ሂንቴ ካሃ ጊዳና።  
 ሃራ አሳ ካሃ ጊሾ ጋዳ ታኒ ታ ለዓቴላ ቦላ አይስ ፒርዶ?  
 30 ታኒ ሚያ ካሳ ያሳ ጋላታዳ ሚኮ ባሊዳዳ አይስ ቦሬቲያና?  
 31 ሂዛ፡ ሂንቴ አይ ሚኮ አይ ኡዪኮ፡ ዋይኮ አይ አሊኮካ ኡባባ ያሳ ቦንቾስ አሊቴ።  
 32 አይሁዳታ ጊዲን ገሪኬታ ጊዲን ዋይኮ ያሳ ዋሳ ኬሌ ጊዲን ኦዴስካ ቆቤ ጊዳፒቴ።  
 33 ታኒ ኡባ ዋዴ ዳርታ አሻናው ኤንቲ ማዴቲያ ኦጌ ኮያይሲፔ አቲን ታና ማዲያ ኦጌ ኮዪኬ።

# 11

1 ታኒ ኪሪስቶሳ ለሚሱዋ ካሌይሳዳ፡ ሂንቴካ ታና ካለቴ።

## ጎይኖ ማራ

2 ሂንቴ ኡባባን ታና ቆፒያ ጊሾኔ ታ ታማርሲዳ ቲሚርቲያ ሚንሊዲ ናጊዳ ጊሾ ታ ሂንቴና ጋላታይስ።  
 3 ሺን ኪሪስቶሳ አዴ ኡባስ ሁዔ፡ አዴይ ማጫሳስ ሁዔ፡ ቃሲ ያሳይ ኪሪስቶሳስ ሁዔ ጊዴይሳ ሂንቴ ኤራና ሚላ ታ ኮያይስ።  
 4 ባ ሁዒያ ጉሉንቲዲ ያሳ ዋሲያ ዋይኮ ቲንቢቴ ኦዲያ አዴ ኡባይ ሁዔ ጊዲዳ ኪሪስቶሳ ቶቼስ።  
 5 ባ ሁዒያ ቃጮና ያሳ ዋሲያ ዋይኮ ቲንቢቴ ኦዲያ ማጫሲያ ሁዔ ጊዲዳ ባ አዪና ቶቻውሱ። ባ ሁዒያ ቃጮና ማጫሲያ ባ ሁዒያ ሜዴቲዳ ማጫሳ ሚላ።  
 6 ማጫሲ ባ ሁዒያ ቃጮና ኢዲኮ፡ ባ ሁዒያ ቃንጻቶ። ሺን ኢው ሁዒያ ቃንጻይ ዋይኮ ሜዴይ ቦርሶ ጊዲኮ ባ ሁዒያ ቃጮ።  
 7 አዴይ ያሳ ለሚሶኔ ያሳ ቦንቾ ጊዲያ ጊሾ ባ ሁዒያ ቃቻናው ቤሴና፡ ሺን ማጫሲ አዴስ ቦንቾ።

10:26 ማዝ 24:1    11:1 1ቆሮ 4:16፤ ፊል 3:17    11:7 ሜዴ 1:26-27

8 ማጫሲ አዳፊ ሜዴታሱፔ ኣቲን አዳይ ማጫሳፔ ሜዴቲቤና።

9 ማጫሲ አዳሰ ሜዴቲሲፔ ኣቲን አዳይ ማጫሳሰ ሜዴቲቤና።

10 ሃይሳ ጊሾኔ ከታንቸታ ጊሾ ማጫሲ ባው ማቲ ዳዔይሳ ቤሲያ ማላ ባ ሁዒን ቃጫናው ቤሴሰ።

11 ሺን ጎዳ ቆፋን ማጫሲ አዳይ ባይና ዳና፤ አዳይካ ማጫሲ ባይና ዳዔና።

12 ማጫሲ አዳፊ ሜዴቲዳይሳዳ አዳይካ ማጫሳፔ ዩሌቲሰ። ሺን ኡባባይካ ያሳፊ ሜዴቲሰ።

13 እኔ ሂንቴ ፒርዲቴ። ማጫሲ ባ ሁዒ ቃጮና ያሳ ዋሳናው ቤሲ?

14 አዳይ ባ ሁዒያ ዲቺኮ ኢያው ቦርሶ ጊዳይሳ ሃሪ ኣቶሺን ሜዴቲሉ ሂንቴና ታማርሴኔ?

15 ሺን ማጫሲ ባ ሁዒያ ዲቺኮ ኢው ቦንቸ ጊዳይኔ? ማጫሳሰ ሁዒይ ኢሚቲዳይ ኢያ ባና ካማና ሚላሳ።

16 ሺን ሃይሳ ቦላ ፓላማናው ኮያ አሲ ዳዒኮ፣ ኑሰ ጊዲን ዋይኮ ያሳ ዋሳ ኬላታሰ ጊዲን ሃይሳፊ ሃራ ዋጊ ባዋ።

ጎዳ ካሁዋ ኤኪያ ማራ

(ማቶ 26:26-29፤ ማር 14:22-25፤ ሉቃ 22:14-20)

17 ሂንቴ ኢሲፊ ሺቄይ ጎዳሰ ጊዳናሺን ቆሆሰ ጊዲያ ጊሾ ሃዒ ታ ኢሚያ ከታን ሂንቴና ናሺኬ።

18 ታ ኮይር ሲዒዳይ፣ ሂንቴ ዋሳ ኬላን ሺቄያ ዋዴ ሂንቴ ጊዲን ሻሄቴሉ ዳዔይሳ። ሄ ታ ሲዒዳይሳፊ ባጋይ ቱማ ጊዳይሳ ኣማናይሰ።

19 ሂንቴ ጊዳፊ ቱሚ ዳዔይሳቲ ኦናንቴኮ ኤሬታና ማላ ሂንቴ ጊዲን ሻኮይ ዳናይሲ ኣቴና።

20 ሂንቴ ኢሲፊ ሺቄያ ዋዴ ሂንቴ ሺቄይ ጎዳ ካሁዋ ማናሳ ጊዳና።

21 ሂንቴ ካሉ ሚያ ዋዴ ኢሶይ ኢሱዋ ናጎና ባይሳ ባይሳ ሚያ ጊሾ ኢሶይ ኮሻቴሰ ሃንኮይ ቃሲ ማሉቲሰ።

22 ቱማ ሂንቴ ማናዉኔ ኡያናው ሂንቴው ኬሉ ባዌ? ዋይኮ ያሳ ዋሳ ኬላ ካዴቲ? ኣይኮይ ባይና ማንቆታ ዩላዬቲ? ታ ሂንቴና ዋይሳ? ሃይሳሰ ታ ሂንቴና ናሾ? ናሺኬ።

23 ታኒ ሂንቴው ኢሚዳ ቲሚርቲያ ጎዳፔ ኤካሰ። ጎዳ ዩሱሲ ኣዲዲ ኢሚቲያ ቃማን ኡይላ ኤኪዲ፣

24 ያሳ ጋላቲስ። ኡይላ ባሊዲ «ሄዲቴ፤ ሚቴ። ሃይሲ ሂንቴው ኢሜቲያ ታ አሹዋ። ሃይሳ ሚሼ ታና ሃሳዪቴ» ያገሰ።

25 ሄሳዳካ፣ ካሁዋ ሚዲ ሲሚን፣ ፀዓ ኤኪዲ፣ «ሃይሲ ፀዓይ ታ ሱላን ኤቂያ ኦራላ ጫቁዋ። ሂንቴ ኢያፔ ኡያ ዋዴ ኡባን ታና ሃሳዪቴ» ያገሰ።

26 ሂንቴ ሃ ኡይላ ሚያ ዋዴኔ ሃ ፀዓ ኡያ ዋዴ ኡባን ጎዳይ ያና ጋካናው ኢያ ሃይቁዋ ኦዴታ።

27 ሄሳ ጊሾ፣ ቤሶና ኦጊያን ጎዳ ኡይላ ሚያ ዋይኮ ጎዳ ፀዓ ኡያ ኦኒካ ኢያ አሹዋኔ ሱላ ቶቺዳ ጊሾ ባ ናጋራን ኦይሼቴስ።

28 ሺን አሲ ባና ፓጮ። ያቲዲ ኡይላ ዋ፤ ፀዓፔካ ኡዮ።

29 ጎዳ አሹዋባ ሻኪ ኤሮና፣ ኡይላ ሜይኔ ፀዓፔ ኡዬይ፣ ባ ቦላ ፐርዳ ሚሲኔ ኡዬስ።

30 ሄሳ ጊሾ፣ ሂንቴ ጊዶፌ ዳሮቲ ዳቡሪዶሶና፤ ሃርጊዶሶና፤ ቃሲ ኡንዴና አሳቲ ሃይቂዶሶና።

31 ሺን ኑ ኑና ፓጪ ቤዲዳባ ጊዲያኮ፣ ኑ ቦላ ፐርዴታናሺን።

32 አላሚይ ፐርዴቲያ ዋዴ ኑ አላሚያራ ፐርዴቶና ሚላ ሃዲ ጎዳይ ኑና ሴሬስ።

33 ሄሳ ጊሾ፣ ታ አሻቶ፣ ጎዳ ካሁዋ ማናው ሂንቴ ሺቂያ ዋዴ ኢሶይ ኢሱዋ ጋላ ኤኪቴ።

34 ሂንቴ ሺቆይ ፐርዳስ ጊዶና ሚላ ኮሻቲዳ ኦኒካ ዴዲኮ፣ ባ ሶን ዋ።

አቲዳባ ታኒ ያ ባዳ ሂንቴው ኦዳና።

# 12

## ጌሻ አያና አሞታታ

1 ታ አሻቶ፣ ጌሻ አያና አሞታታባ ሂንቴ ኤራና ሚላ ታ ኮያስ።

2 ሂንቴ ያሳ አማኖና ዋዴ ዶኒ ባይና ኤቃታን ጎሹቲዲ፣ ሂንቴ ኤሮና ሶ ቢዳይሳ ኤሬታ።

3 ያሳ አያናይ ካሌሊያ አሲ ኦኒካ፣ «ዬሱሲ ቃንጌቶ» ያገና። ቃሲ ጌሻ አያናይ ካሌሊያ ዴዲሺን፣ ኦኒካ፣ «ዬሱሲ ጎዳ» ጋናው ዳንዳያናይሳ ሂንቴ ኤራና ሚላ ኮያይስ።

4 ዲማ ዲማ አያና አሞታቲ ዴዎሶና፣ ሺን አሞታታ አሚያ አያናይ ኢሱዋ።

5 ኑ ጎዳሰ ኦሊያ ዲማ ዲማ ኦሶቲ ዴዎሶና፣ ሺን ጎዳይ ኢሱዋ።

6 ኑ ጎዳሰ ኦሌያ ዲማ ዲማ ኦጌቲ ዴዖሶና፣ ሺን ሄ ኦጌታን ኣሳ ኡባን ኦሌያ ያሳይ ኢሱቦ።

7 ሺን ኢሱቦሰ ኢሱቦሰ ኢሜቲዳ ኢሞታታን ሃራታ ማዳና ማላ ጌሻ ኣያናይ ቆንጮሶ።

8 ጌሻ ኣያናይ ኢሱቦሰ ጨንጫቴላ ኩሚዳ ቃላ ኢሜሰ፤ ቃሲ ኢሱቦሰ ኤራቴላ ኩሚዳ ቃላ ኢሜሰ።

9 ሄ ጌሻ ኣያናይ ኢሱቦሰ ኣማና፣ ሃንኩቦሰ ቃሲ ፓሌያ ዋልቃ ኢሜሰ።

10 ጌሻ ኣያናይ ኢሱቦሰ ማላታ ኦሌያ ዋልቃ፣ ኢሱቦሰ ቲንቢቴ ኦሊያ ዋልቃ ኢሜሰ። ኢሱቦሰ ኣያናፔ ኣያና ሻኪ ኤሪያ ዋልቃ፣ ኢሱቦሰ ዲማ ዲማ ዶናን ኦሊያ ዋልቃ፣ ቃሲ ኢሱቦሰ ዲማ ዲማ ዶናን ኦዴቲዳይሳ ቢርሺያ ዋልቃ ኢሜሰ።

11 ሺን ሃ ኡባ ኦሌይ ሄ ኢሲ ጌሻ ኣያና። ኢ ኮያ ማላ ኢሲ ኢሲ ኣሳሰ ዲማ ዲማ ኢሞታ ኢሜሰ።

**ኣሳቴላኔ ዲማ ዲማ ቢሊቴታ**

12 ኢሲ ኣሳቴላን ዳር ቢሊቴቲ ዴዖሶና፣ ሺን ሄ ዲማ ዲማ ቢሊቴቲ ኢሲ ኣሳቴላ ገደሶና። ሄሳዳካ፣ ኪሪሰቶሲ ዲማ ዲማ ቢሊቴቲ ዴዲያ ኣሳቴላ ማላ።

13 ኦኒ ኣይሁዴ ገደን ገሪኬ ገደን ኣይሌ ገደን ዋማና ገደን፣ ኡባይ ኢሲ ኣሳቴላ ገደናው ጌሻ ኣያናን ፃማቄቲዳ። ቃሲ ኦ ኡባይ ኢሲ ጌሻ ኣያና ኤኪዳ።

14 ኦ ኣሳቴላን ዲማ ዲማ ቢሊቴቲ ዴዖሶናፔ ኣቲን ኢሲ ቢሊቴ ገደና።

15 ቶሆይ፣ «ታኒ ኩሼ ገደና ገሾ ቢሊቴ ገደኬ» ገኮ፣ ኢ ሄሳ ገደ ገሾ ቢሊቴቲላይ ኣቲዬ?

16 ሃይላ፣ «ታኒ ኣይፌ ገደና ገሾ ቢሊቴ ገደኬ» ገኮ፣ ኢ ሄሳ ገደ ገሾ ኣሳቴላፌ ኢሲ ቢሊቴ ገደይሲ ኣቲዬ?

17 ኣሳቴላ ኡባይ ኣይፌ ፃላላ ገደዳኮ፣ ኦ ኣይቢን ሲዓኔ? ቃሲ ኣሳቴላ ኡባይ ሃይላ ፃላላ ገደዳኮ ኦ ኣይቢን ሲንጋኔ?

18 ሺን ያሳይ ባ ኮዩዳይሳዳ፣ ኣሳቴላ ገደን ዲማ ዲማ ቢሊቴታ ዋላሰ።

19 ኡባይ ኢሲ ቢሊቴ ገደዳኮ ኣሳቴላ ዋኒዲ ዳኔ?

20 ሺን ቢሊቴቲ ዳር ገደኮካ፣ ኣሳቴላይ ኢሶ።

21 ኣይፌይ ኩሼኮ፣ «ኔ ታው ኮሻካ» ጋናው ዳንዳዔና። ዋይኮ ሁዔይ ቶሆኮ፣ «ኔ ታው ኮሻካ» ጋናው ዳንዳዔና።

- 22 ሺን ዳቡራ ዳኒያ አሳቴላ ቢሊቴቲ ኑስ አዲዲ ኮሾሶና።
- 23 ቦንቾ ኮሼና ጊዲ ኑ ቆፒያ ኑ ቢሊቴታፔ ባጋታ ዳሮ ቦንቾስ።  
ቃሲ ኑ ቦርሴቲያ ኑ አሳቴላ ቢሊቴታ አሊ ቦንቾዲ ናጎስ።
- 24 ኑ ቤዒን ቦርሶና አሳቴላ ቢሊቴታስ ቦንቾ ኮሼና። ሺን ያሳይ ኑ አሳቴላ ቢሊቴታ ዋሊራ ጋሴሊዲ ቦርሲያ ቢሊቴታስ አዲያ ቦንቾ አሚስ።
- 25 አሳቴላ ቢሊቴቲ ኢሶይ ኢሱዋራ ሻኮ ሜዶና ዋሊስ ቆፓና ሜላ ኦሊዲ ሜዲስ።
- 26 አሳቴላ ቢሊቴታፔ ኢሶይ ሳኬቲኮ ቢሊቴቲ ኡባይ ኢያራ ሳኬቶሶና። አሳቴላ ቢሊቴታፔ ኢሶይ ቦንቼቲኮ ቢሊቴቲ ኡባይ ኢያራ ኡፋይቶሶና።
- 27 ሂንቴ ኡባይ ኪሪስቶሳ አሳቴላ፤ ቃሲ ሂንቴ ኢሶይ ኢሶይ ኢያ ቢሊቴታ።
- 28 ዋሳ ኬላን ያሳይ፣ ኮይሮ ሃዋሬታ፣ ናምዓንሉ ናቤታ፣ ሄቫንሉ አስታማሬታ፣ ካሊዲ ማላታ ኦሴይሳታ፣ ፓሴይሳታ፣ ሃራታ ማዴይሳታ፣ ዋሳ ኬላ አይሴይሳታ፣ ዲማ ዲማ ደናን ሃሳይይሳታ ዋሊስ።
- 29 ኡባይ ሃዋሬ? ኡባይ ናቤ? ኡባይ አስታማሬ? ኡባይ ማላታ ኦሊ?
- 30 ኡባይ ፓሴይ? ኡባይ ዲማ ዲማ ደናን ኦዴቲ? ኡባይ ዲማ ዲማ ደናን ኦዴቶይሳ ቢርሺ?
- 31 ሺን ኡባሬ አዲያ አሞታ ሚንሊዲ ኮዪቴ።  
ቃሲ ኡባሬ አዲያ ኦጊያ ታ ሂንቴና ቤሳና።

# 13

## ቱማ ሲቆ

- 1 ታኒ እሳ ቃላኔ ኪታንቾ ቃላ ኦዴታናው ዳንዳዒኮካ፣ ታው ሲቆይ ቆዩኮ፣ ጮ ጊሪያ ዳላ ሜላ።
- 2 ቲንቢቲ ኦዲያ አሞይ ታው ዴዒኮካ፣ ፀራ ኡባ ኤሪኮካ፣ ኤራቴሊ ኡባይ ዴዒኮካ፣ ቃሲ ዴሪያ ዴንሊዲ ሃራሶ ኤፊያ አማኖይ ታው ዴዒኮካ፣ ሲቆይ ቆዩኮ፣ ታ አይኮካ ጊዲኬ።
- 3 ታው ዴዒያባ ኡባ ማንቆታስ አሚኮካ፣ ሃሪ አቶሺን፣ ታና ታማስ አላ አሚኮካ፣ ሲቆይ ቆዩኮ ታና አይኮካ ማዴና።
- 4 ሲቆይ ዳንዳዒንቾ። ሲቆይ ኬሃ። ሲቆይ ቃናቴና። ሲቆይ ጩቄቴና። ሲቆይ ኦቶሬና።

12:28 ኤፌ 4:11    13:2 ማቶ 17:20፤ 21:21፤ ማር 11:23

5 ሲቆይ ቤሶናባ ኦሴና። ሲቆይ ኡዜቴና። ሲቆይ ዪሎቴና። ሲቆይ ባ ቆሆ ፓይዳና።

6 ሲቆይ ቱማን ኡፋይቴሲፔ ኣቲን ዋርዶን ኡፋይቴና።

7 ሲቆይ ኡባ ዳንዳዔሰ፤ ኡባ ኣማኔሰ፤ ሎዖባይ ሃናና ጊዲ፥ ኡፋይሳን ናጌሰ፤ ኡባ ጌንጩሰ።

8 ሲቆይ ወርሴላ ጋካናው ጳዬና። ሺን ቲንቢቴይ ኣታና፤ ዲማ ዲማ ደናን ኦዴቴይሲ ኣታና፤ ኤራቴላካ ኣጳና።

9 ኑ ኤራቴላፌ ጉላ ኤርሰ፤ ቲንቢቴያፔ ባጋ ኦደሰ።

10 ሺን ፖሎ ጊዲዳይሲ ያ ዋዴ ፖሎ ጊደናይሲ ኣታና።

11 ታኒ ናባ ዴዒያ ዋዴ ናባዳ ሃሳይሰ፤ ናባዳ ቆፓይሰ፤ ናባዳ ኣኩካይሰ። ታ ካሃሚዳ ዋዴ ናባቴላ ሃኑዋ ኣጋሰ።

12 ሃሲ ፖያይ ባይናሶን ማሰቶቴን ቤዔይሳዳ ቤዖሰ። ሺን ሄ ዋዴ ኑ ቆንጩን ቤዓና። ሃሲ ኑ ኤራቴላፌ ጉላ ኤርሰ። ሺን ሄ ዋዴ ያሳይ ኑና ኤሬይሳዳ ፖሎ ኤራና።

13 ሂዛ፥ ኣማኖይ፥ ኡፋይሲኔ ሲቆይ፥ ሃ ሃቫቲ ኤቁዲ ዳና። ሺን ሃይሳታፔ ኣጴይ ሲቆ።

# 14

## ቲንቢቴኔ ዲማ ዲማ ደና

1 ሲቆ ካለቲ። ኣያና ኣሞታታ ሚንሉዲ ኮዪቴ፤ ኡባፌ ኣሉዲ፥ ቲንቢቴ ኣሞታ ሚንሉዲ ኮዪቴ።

2 ዲማ ዲማ ደናን ኦዴቴያ ኣሲ ያሳሰ ኦዴሲፔ ኣቲን ኣሳሰ ኦዴና። ሺን ኣሳሰ ቆንጩቦና ፀራ ኣያና ዋልቃን ኦዴቴያ ጊሾ ኦኒካ ኢ ኦዴቴይሳ ኣኩኩና።

3 ሺን ቲንቢቴ ኦዴይሳቲ ኣሴ ዲቻናው፥ ሚንሉላናውኔ ሚንላናው ኣሳሰ ኦዴሰ።

4 ዲማ ዲማ ደናን ኦዲያ ኣሲ ባና ዲቻሰ። ሺን ቲንቢቴ ኦዲያ ኣሲ ዋሳ ኬላ ዲቻሰ።

5 ሂንቴ ኡባይ ዲማ ዲማ ደናን ኦዴቴያኮ ታ ደሳይሰ። ሺን ቲንቢቴ ኦዳናይሳ ኣላዳ ደሳይሰ። ዲማ ዲማ ደናን ኦዴቴይሳ ዋሳ ኬላ ዲቻናው ቢርሺያ ኣሲ ጳዪኮ፥ ዲማ ዲማ ደና ኦዴቴያሳፌ ቲንቢቴ ኦዴይሲ ኣጴሰ።

6 ሺን ታ ኣሻቶ፥ ታኒ ሂንቴኮ ባዳ ቆንጩላን ዋይኮ ኤራቴላን ዋይኮ ቲንቢቴ ኦደን ዋይኮ ተሚርቴን ጊደናሺን ዲማ ዲማ ደናን ኦዴቴኮ ሂንቴና ኣይ ማዳኔ?

7 ዲማ ዲማ ዬላ ሚሺታሰ ኣሲ ቆሞ ገርሲ ዴዒኮ፥ ሱሱልዔ ገርሲኔ ዲላ ገርሲ ዋቲዲ ሻኪ ኤራኔ?

8 ቃሲ ሞይዜ ፑኖይ ጌዬዲ ኤሬቶና ኢዲኮ ኮላስ ጊጌቲይ ኦኔ?

9 ሃሳዳካ፣ ዲማ ዲማ ደናን ሂንቲ ኦይቲይሲ ቆንጩ ጊደና ኢዲኮ ሂንቲ ኦይቲይ ኦኔ ኤሬኔ? ሄሲ ጫርኮስ ኦዲያ ማላ።

10 ሃ ኣላሚያን ዳር ደናቲ ዴዎሶና፤ ሄ ኡባስ ቢርሼላ ዴዔስ።

11 ሺን ኢሲ ኣሲ ኦይቲያ ደና ታኒ ኤርና ኢዲኮ ኢ ታው ኢማሌ ጊዳስ፤ ታካ ኢያው ኢማሌ ጊዳይስ።

12 ሃሳዳካ፣ ጌሻ ኣያና ኢሞታ ሂንቲ ኤካናው ማንሊዲ ኮይኮ፣ ሞሳ ኮላ ዲቻናው ኡባፌ ኣጲያ ኢሞታ ኮይቲ።

13 ዲማ ዲማ ደናን ኦይቲያ ኣሲ ባ ኦዳ ቢርሻናው ቢርሼላ ኢሞታይ ኢሜታና ማላ ያሳ ሞሶ።

14 ታኒ ዲማ ዲማ ደናን ያሳ ሞሲኮ፣ ታ ኣያናይ ሞሴስ፣ ሺን ታ ሞዛናይ ኣይኮካ ጎዔቲና።

15 ያቲን፣ ታ ኣይ ኦላናው ኮሺ? ታኒ ታ ኣያናን ሞሳይስ፤ ታ ሞዛናንካ ሞሳይስ። ታኒ ታ ኣያናን ዩፃይስ፤ ታ ሞዛናንካ ዩፃይስ።

16 ሄሳ ጊደና ኢዲኮ ኔኒ ኔ ኣያናን ያሳ ጋላቲያ ሞዴ ሄ ቤሳን ኔኒ ጌይሳ ኤርና ኣሲ ኔ ጋላቲይሳ ሞይጊዲ፣ «ኣሚንዒ» ጋኔ?

17 ኔኒ ያሳ ጋላቲይሲ ሎዎ፣ ሺን ሃራ ኣሲ ማዴና።

18 ታ ሂንቲ ኡባፌ ኣላዳ ዲማ ዲማ ደናን ኦይቲያ ጊሾ ያሳ ጋላታይስ።

19 ሺን ታኒ ሞሳ ኮላን ሃራታ ታማርሳናው ዲማ ዲማ ደናን ታው ሙኩሉ ቃላ ኦይታናፔ ኤሬቲያ ደናን ኢቻሹ ቃላ ኦይታናው ደሳይስ።

20 ታ ኢሻቶ፣ ሂንቲ ቆፋን ናይታዳ ሃኖፒቲ። ሂንቲ ኢታባስ ናይታዳ ሃኒቲፔ ኣቲን ሂንቲ ቆፋን ካሃማታ ጊዲቲ።

21 ጎዳይ፣ ጌሻ ማፃፋን፣

«ታኒ ሃ ኣሳስ፣

ዲማ ዲማ ደናን ኦይቲያ ኣሳኒኔ

ኢማላ ኢንፃርሳን ኦይቲያ ኣሳን ኦዳና።

ሺን ሄሲ ሃኒኒካ ታና ሲዎኮና» ያጌስ።

22 ሂዛ፣ ዲማ ዲማ ደናን ሃሳዮይ፣ ኣማኖና ኣሳስ ማላ ጊዳሲፔ ኣቲን ኣማኒያ ኣሳሳ ጊዳና። ቲንቢቲይ ኣማኒያ ኣሳስ ማላ ጊዳሲፔ ኣቲን ኣማኖና ኣሳሳ ጊዳና።

23 ሞሳ ኮላ ኣሳይ ኢሲፌ ሺቁያ ሞዴ ኡባይ ዲማ ዲማ ደናን ኦይቲኮ ኤርና ሞይኮ ኣማኖና ኣሳይ ሂንቲ ሺቁፀ ዩዲ፣ «ሃይሳቲ ጎዮሶና» ጎኮናዬ?



24 ሺን ኤሮና ወይኮ አማኖና አሳይ ዋሳ ከሌ ያ ወዴ አሳይ ቲንቢቲ ኦዲሺን፣ ሲዲኮ ባ ናጋራ አከካና፤ ቃሲ ኢ ሲዲዳ ቃላን ፒርዴታና።

25 ኤንቲ ኢያ ዋዛናን ገሚዳ ቆፋ ቆንጨሳና። ሄሳዳካ፣ «ቲማ ያሳይ ሂንቲ ጊዶን ዴዔስ» ያጊዲ ማርካቲዲ፣ ጉፋኒዲ ያሳሰ ጎይናና።

ጎይኖ ማራ

26 ታ አሻቶ፣ ኑ ወይጊኖ? ሂንቲ ኢሲፌ ሸቂያ ወዴ ኢሱዋሰ ማዘሙሬይ ዴዔስ፤ ኢሱዋሰ ታማርሶ አሞቲ ዴዔስ፤ ኢሱዋሰ ቆንጨፍሌ ዴዔስ፤ ኢሱዋሰ ዲማ ዲማ ዶናን ሃሳዮይ ዴዔስ፤ ኢሱዋሰ ቢርሺፋ አሞቲ ዴዔስ። ሄ ኡባይ ዋሳ ከሌ ዲቺያባ ጊዳናው ቤሴስ።

27 ዲማ ዲማ ዶናን ኦዴቲያ አሳቲ ዴዒኮ፣ ናምዓ ወይኮ ዳሪኮ ሄኻ ጊዲዲ ማራን ማራን ሃሳያናው ቤሴስ። ኤንቲ ኦዴቲይሳ ሃራ አሲ ቢርሾ።

28 ሺን ቢርሺያ አሲ ዳዩኮ፣ ዲማ ዲማ ዶናን ኦዴቲይሲ ዋሳ ከላን ሲዲ ጎ። ባዉኔ ባ ያሳሰ ኦዶ።

29 ቲንቢቲ ኦዴይሳቲ ናምዓ ወይኮ ሄኻ ጊዲዲ ኦዶ። ቃሲ ሃራቲ ኤንቲ ጊያባ ፒርዶና።

30 ሄ ሸቁዋን ዴዒያ ሃራ አሳሰ ኢሲባይ ቆንጨኮ ካሴ ኦዴቲይሲ ሲዲ ጎ።

31 ኡባይ ታማራና ሜላኔ ኡባይ ሚናና ሜላ ማራን ማራን ቲንቢቲ ኦዳናው ዳንዳዔታ።

32 ናቤታ አያናይ ናቤታሰ ከቲቲሰ።

33 ጌሻታ ዋሳ ከላ ኡባይ ሜዜቲዳይሳዳ ያሳይ ሳርቲላ ያሳፌ አቲን ጫቦ ያሲ ጊዳና።

34 ማጫሲ ዋሳ ከላን ሲዲ ጎ። ሙሴ ሂጌይ ጌይሳዳ ኤንቲ ሃራቶፌ አቲን ዋሳ ከላን ኦዳናው ኤንታው ማቲ ባዋ።

35 ማጫሲ ዋሳ ከላን ሃሳዮይ ቦርሶ ጊዲያ ጊሾ ኢሲባ ኤራናው ኮይኮ ሶን ባንታ አዚናታ ኦይቾና።

36 ያሳ ቃላ ኮይሮ ሂንቲ ኤሂዴቲ? ወይኮ ያሳ ቃላይ ሂንቲ ያላላኮ ዪዴ?

37 ኦኒካ ባና ናቤ ወይኮ ባና ያሳ አሲ ጊዲ ቆፒኮ፣ ታኒ ሂንቲው ያፌይሲ ጎዳ ከታ ጊዴይሳ አኬኮ።

38 ሺን ኦኒካ አኬኮና ኢዲኮ ኢካ አኬኬቶፎ።

39 ሂሳ ጊሾ፣ ታ አሻቶ፣ ቲንቢቲ ኦዳናው ሚንሌዲ አሞቲቲ፤ ቃሲ ዲማ ዲማ ዶናን ኦዴቲይሳካ ዲጎፊቲ።

40 ሺን ኡባይካ ዋጋኒኔ ማራን ገደ።

# 15

## ኪሪሰቶሳ ሃይቆፕ ዴንዲዋ

1 ታ ኢሻቶ፣ ታ ሂንቴው ማርካቲዳ ዋንጌላ ሂንቴ ኤኪዳይሳኔ ሂንቴ ኣማናይ ኢያን ኤቁዳይሳ ሂንቴ ኣኬካና ሜላ ኮያይሰ።

2 ታ ታማርሲዳ ዋንጌላ ሚንሊዲ ኦይኪኮ ሂንቴ ኢያን ኣታና። ሄሲ ሃናና ኢዳኮ ሂንቴ ኣማናይ ሃዳ ገዳና።

3 ታኒ ኤኪዳ ኡባፌ ኣዲያ ኪታ ካሴታዳ ሂንቴው ኣማሰ። ሄሲካ፣ ጌሻ ማፃፋይ ጌይሳዳ፣ ኪሪሰቶሲ ኑ ናጋራ ጊሾ ሃይቁሰ።

4 ዋጌቲሰ፤ ጌሻ ማፃፋይ ጌይሳዳ፣ ሄቸንፉ ጋላሳን ሃይቆፕ ዴንዲሰ።

5 ጴጌርሳሰ ቆንጨሰ። ሄሳፌ ጉዬ፣ ታማኔ ናምዑ ሃዋሬታሰ ቆንጨሰ።

6 ሄሳፌ ጉዬ፣ ኢቻሹ ፃታፔ ዳሪያ ኣሳሰ ኢሲ ቶሆ ቆንጨሰ። ኤንታፌ ዳሪያ ባጋይ ሃዲ ጋካናው ፓፃ ዴዖሶና፣ ሺን ጉላቲ ሃይቁደሶና።

7 ሄሳፌ ጉዬ፣ ያይቆባሰ ቆንጨሰ፤ ጉዬፔ ባ ሃዋሬታ ኡባሰ ቆንጨሰ።

8 ቃሲ ዉርሴላን ኣዉጫያ ሜላ ገዲዳ ታው ቆንጨሰ።

9 ታኒ ዬሱሳ ሃዋሬታ ኡባፌ ላፋ። ታኒ ያሳ ዋሳ ኬላ ጎዲዳ ጊሾ ዬሱሳ ሃዋሬ ጌቲታዳ ፃጌታናው ቤሶናይሳ።

10 ሺን ያሳ ኣጵ ኬሃቴላን ታ ሃዲ ገዲዳይሳ ገዳሰ፤ ኢ ታው ኢሚዳ ኣጵ ኬሃቴላይ ሜላ ኣቲቤና። ታኒ ሃንኮ ሃዋሬታፔ ኣላዳ ዳቡራሰ። ሺን ታራ ዴዲያ ያሳ ኣጵ ኬሃቴላይ ኦሊሰፔ ኣቲን ታና ገዲኬ።

11 ሂዛ፣ ታና ገዲን ኤንቲ፣ ኑ ኡባይ ታማርሴይ ሄሳ፤ ሂንቴካ ሄ ኪታ ኣማኒዴታ።

## ሃቆፕ ዴንደ

12 ኪሪሰቶሲ ሃይቆፕ ዴንዲዳይሳ ኑ ሳባኪያ ዋዴ ሂንቴፌ ኢሶቲ ኢሶቲ ያቲን፣ ዋይገዲ፣ «ሃይቆፕ ዴንደይ ባዋ» ያጎና?

---

15:3 ኢሳ 53:5-12    15:4 ማዘ 16:8-10፤ ማቶ 12:40፤ ሃ.ኦ 2:24-32  
15:5 ማቶ 28:16-17፤ ማር 16:14፤ ሉቃ 24:34፣ 36፤ ዮሃ 20:19    15:8 ሃ.ኦ 9:3-6    15:9 ሃ.ኦ 8:3

13 ሃይቆፔ ዳንዶይ ባይናባ ጊዲኮ ኪሪሰቶሲ ሃይቆፔ ዳንዲቤና ጉሱ።

14 ኪሪሰቶሲ ሃይቆፔ ዳንዲቦናባ ጊዲኮ ኑ ቲሚርቴይ ቃሲ ሂንቴ አማኖይካ ሃዳ።

15 ሃይቆፔ ዳንዶይ ባይናሺን፣ ኑኒ ያሳይ፡ «ኪሪሰቶሳ ሃይቆፔ ዳንሲ» ያጊዲ ሳባኪሼ ያሳ ዎርዳንቾ ማርካታ ጊዲዳ ጉሱ።

16 ሃይቆዳ አሳይ ሃይቆፔ ዳንዲቦናባ ጊዲኮ ሂዛ፣ ኪሪሰቶሲ ሃይቆፔ ዳንዲቤና።

17 ኪሪሰቶሲ ሃይቆፔ ዳንዶናባ ጊዲኮ፣ ሂንቴ አማኖይ ሃዳ፤ ቃሲ ሂንቴ ሃዲ ጋካናው ሂንቴ ናጋራን ዳዔታ።

18 ሂዛ፣ ኪሪሰቶሳ አማኒዲ ሃይቆዳይሳቲካ ጳዪዶሶና ጉሱ።

19 ኑኒ ሃ አላሚያ ዴዑዎ ፃላላሰ ኪሪሰቶሳን ኡፋይሲ ኦሊዳባ ጊዲኮ፣ ሃ ሳዓን ዳዒያ አሳ ኡባፌ ኑባይ አጲዳ ዪባታ።

20 ሺን ኪሪሰቶሲ ሃይቆዳይሳታሰ ሃይቆፔ ዳንዶን ባይራ ጊዲዲ ተማ ዳንዲሰ።

21 ሃይቆይ ኢሲ አሳ ባጋራ ሃ አላሚያ ዪዳይሳዳ ሃይቆፔ ዳንዶይ ኢሲ አሳ ባጋራ ዪሰ።

22 አዳሚ ባጋራ አሳ ኡባይ ሃይቆዳይሳዳ ኪሪሰቶሳ ባጋራ አሳ ኡባይ ዳዖን ዳና።

23 ሺን ኢሶይ ኢሶይ ባ ማራን ማራን ዳንዳና። ኪሪሰቶሲ ኡባፌ ካሴቲዲ ዳንዲሰ፤ ሄሳፌ ጉዬ፣ ኪሪሰቶሳይሳቲ ኢ ያ ዎዴ ዳንዳና።

24 ሄሳፌ ጉዬ፣ ኪሪሰቶሲ ሃራይሳ፣ ማታኔ ዎልቃ ኡባ ጳይሲዲ፣ ካዎቲላ ያሳ አዎሰ ኢሚያ ዎዴ ዎዲያ ዉርሴላይ ያና።

25 ያሳይ ኢያ ሞርኬታ ኡባ ኢያ ቶሁዎፔ ጋርሳን ዎላና ጋካናው ኪሪሰቶሲ ሃራናው ቤሴሰ።

26 ዉርሴላን ኢ ጳይሳናው ዳዒያ ሞርኬይ ሃይቆ።

27 ጌሻ ማፃፋን፣ «ያሳይ ኡባባ ኢያ ማታፔ ጋርሳን ሃሪሲሰ» ጌቲቲዲ ፃፊቲሰ። ሺን ኡባ ኢያ ማታፔ ጋርሳን ሃሪሲሰ ጌይሲ፣ ኡባባ ኢያ ማታፔ ጋርሳን ሃሪሲዳ ያሳ ጉጃና።

28 ኡባባይ ኪሪሰቶሳ ማታፔ ጋርሳን ሃራቲዳፔ ጉዬ ኪሪሰቶሲ ቃሲ ባ ሁዔን ኡባባ ባው ሃሪሲዳ ያሳሰ ሃራታና። ሄ ዎዴ ያሳይ ባ ፃላላ ኡባ ሃራና።

29 ሃይቆዳይሳቲ ዳንዶናባ ጊዲኮ ኤንታ ጊሾ አሳሰ አይቢ ዎዴይ ዳዒ? ሃይቆዳይሳቲ ዳንዶናባ ጊዲኮ ያቲን፣ አይሰ፣ አሳይ ሃይቆዳይሳታ ጊሾ ፃማቄቶና?

30 ያቲን፡ ኑኒ ኣይሰ ኡባ ዎዴ ኑናቴላ ማቶስ ኣሌ ኣሞና?

31 ታ ኣሻቶ፡ ታ ጋላስ ጋላስ ሃይቆስ ኣቋዳ ኣሚታይስ፡ ሄሲካ፡ ጎዳ ኪሪስቶስ ዬሱሳን ዴዲያ ዴዑዎ ኢሲፊቴላን ሂንቴናን ጩቂያ ጊሾሳ፡፡

32 ኣሳ ቆፋሶ ጊዲኮ፡ ታኒ ኤፌሶናን ዶዳራ ቡቴተዳይሲ ታና ኣይ ማዲ? ሃይቂዳይሳቲ ሃይቆፔ ዴንዶናባ ጊዲኮ፡ «ዎንቶ ኑ ሃይቂያ ጊሾ ሃቺ ማና ኡያና» ያጊያ ኣሳ ማላ ጊደስ፡፡

33 ጨማቶፊቴ! ኢታ ላጌቴሌ ሎዎ ኣማሊያ ኢሴስ፡፡

34 ሂንቴ ኣከካኮ ሰሚቴ፡፡ ናጋራ ኦሎፊቴ፡፡ ሂንቴፊ ኢሲ ኢሲ ኣሳይ ያሳ ኤርኮና፡፡ ታኒ ሂንቴና ዬላያናው ሄሳ ጋይስ፡፡

**ዴንዶ ኣሳቴሌ**

35 ኢሲ ኣሲ፡ «ሃይቂዳ ኣሳይ ዋኒዲ ዴንዶኔ? ኤንቴ ኣይ ማላ ኣሳቴላራ ያኔ?» ያጎና ኣጌና፡፡

36 ኔና ኤያው፡ ኔኒ ቢታን ዜሪያ ዜሪላይ ሃይቆና ዶሊና፡፡

37 ኔኒ ዜሪይ ጊስቴ ጊዲን ዎይኮ ሃራ ካላ ቆሞ ኣይፊ ያላላ ዜራሳፔ ኣቲን ዶሊዳ ዶላ ጊዴና፡፡

38 ሺን ያሳይ ዜሪላስ ባ ዶሲዳ ማላ ማዴቴሌ ኣሚስ፡፡ ዲማ ዲማ ዜሪላስ ዲማ ዲማ ኣሳቴሌ ኣሚስ፡፡

39 ማዴቴላ ኡባ ኣሾይ ኢሶ ጊዴና፡፡ ሺን ኣሳ ኣሾይ ኢሶዎ፤ ማሄ ኣሾይ ዲማ፤ ካፎታ ኣሾይ ዲማ፤ ቃሲ ሞሎ ኣሾይ ዲማ፡፡

40 ሳሎ ኣሳቴሌ ዴዴስ፤ ቃሲ ሳዓ ኣሳቴሌ ዴዴስ፡፡ ሺን ሳሎ ኣሳቴላ ቦንቾይ ዲማ፤ ቃሲ ሳዓ ኣሳቴላ ቦንቾይ ዲማ፡፡

41 ኣዎ ቦንቾይ ዲማ፤ ኣጌና ቦንቾይ ዲማ፤ ያሊንቶታ ቦንቾይ ዲማ፤ ኢሲ ያሊንቶይ ሃንኮ ያሊንቱዎፊ ቦንቾን ዲማቴስ፡፡

42 ሃይቂዳይሳቲ ሃይቆፔ ዴንዲያ ዎዴ ሄሳዳ ሃናና፡፡ ሃይቂያ ኣሳቴላይ ዜሪቴስ፤ ሃይቆና ኣሳቴሌ ጊዲዲ ዴንዴስ፡፡

43 ቶሼን ዜሪቴዲ፡ ቦንቾን ዴንዳና፤ ዳቡራን ዜሪቴዲ፡ ዎልቃን ዴንዳና፡፡

44 ማዴቴላ ኣሳቴላይ ዜሪቴዲ፡ ኣያና ኣሳቴሌ ጊዲዲ ዴንዳና፡፡ ማዴታ ኣሳቴሌ ዴዲኮ፡ ኣያና ኣሳቴሌ \* ዴዴስ፡፡

45 ሄሳዳካ፡ ጌሻ ማፃፋን፡ «ኮይሮ ኣዴይ፡ ኣዳሚይ፡ ጋዎ ዴዲያ ኣሴ ጊዲዲ ማዴቴስ» ያጌስ፡፡ ሺን ዉርሴላ ኣዳሚይ፡ ኪሪስቶሲ፡ ዴዎ ኣሚያ ኣያና ጊዲስ፡፡

---

15:32 ኢሳ 22:13 \* 15:44 ኣያና ኣሳቴሌ፡ ጌሻ ኣያናይ ሃራዳ ዎይኮ ጌሻ ኣያናይ ዴዎ ኣሚያ ኣሳቴሌ ጉሱ፡፡ 15:45 ማዴ 2:7

46 ሺን ሜዴታ ኣሲ ኮይሮ ዪን፣ ጉዬፔ ኣያና ኣሲ ዪሲፔ ኣቲን ኣያና ኣሲ ኮይሮ ዪቤና።

47 ኮይሮ ኣዳሚይ ቢታፌ ሜዴቲዳ ቢታ ኣሲ፤ ናሞዓንላ ኣዳሚይ ሳሎፔ ዪዳ ሳሎ ኣሲ።

48 ቢታፌ ሜዴቲዳይሳቲ ቢታፌ ሜዴቲዳይሳ ዳኖሶና። ሳሎይሳቲ ሳሎፔ ዪዳይሳ ዳኖሶና።

49 ኲኒ ቢታፌ ሜዴቲዳ ኣዲያ ዳኔይሳ ማላ ሳሎፔ ዪዳ ኣዲያ ዳናና።

50 ታ ኢሻቶ፣ ታ ጌይሲ ሄሳ፤ ሃዒ ኑ ማዒዳ ኣሳቴላይ ያሳ ካዋቴላ ላታናው ዳንዳዒና። ዋቂያ ኣሳቴላይ ዋቆና ኣሳቴላ ላቴና።

51 ታ ሂንቴው ኢሲ ፀራ ኦዳና። ኑ ኡባይ ሃይቆኮ፣ ሺን ወርሴላን ኡባይ ላሚታና።

52 ሞይዚይ ፑኔቲያ ዋዴ ኣይፌይ ቂጺ ጃላናው ሃሳዮና ላሚታና። ሃይቂዳ ኣሳይ ዋቆና ኣሲ ጊዲዲ ዴንዳና፤ ኑካ ላሚታና።

53 ሃይሲ ዋቂይሲ ዋቆናይሳ፣ ሃይሲ ሃይቂይሲ ሃይቆናይሳ ማዓናው ቤሴሰ።

54 ሃይሲ ዋቂይሲ ዋቆናይሳ፣ ቃሲ ሃይሲ ሃይቂይሲ ሃይቆናይሳ ማዒያ ዋዴ ጌሻ ማፃፋን፣ «ሃይቆይ ያኖን ሚቴቲሰ» ጊያ ቃላይ ፖሌታና።

55 ሄሳዳካ፣  
«ሃይቆ፣ ኔ ያኖይ ኣዉን ዴዒ?  
ሃይቆ፣ ኔ ቆሂያ ዋልቃይ ኣዉን ዴዒ?»  
ጊዳ ቃላይ ፖሌታና።

56 ሃይቆይ ዱኪያ ዋልቃይ ናጋራ፤ ቃሲ ናጋራ ዋልቃይ ሂጌ።

57 ሺን ኑ ጎዳ ዬሱስ ኪሪሰቶሳ ባጋራ ኑስ ያኖ ኢሚያ ያሳ ጋላቲ ጋኮ።

58 ሄሳ ጊሾ፣ ታ ሲቆ ኢሻቶ፣ ቃያና ሚኒዲ ኤቂቴ። ጎዳ ኦሱዋን ሂንቴ ዳቡሪይሲ ጮ ጊዳናይሳ ኤሪዲ ኡባ ዋዴ ጎዳ ኦሱዋ ኣዛሎና ኦሲቴ።

# 16

## ኣማኒያ ኣሳሰ ሸቂዳ ማዲዋ

1 ኣማኒያ ኣሳሰ ሚሼ ሺሾባ ጋላቲያ ዋሳ ኬላታሰ ታኒ ከቲዳይሳዳ ሂንቴካ ኦሲቴ።

15:52 1ቴሴ 4:15-17    15:54 ኢሳ 25:8    15:55 ሆሴ 13:14    16:1 ሮሜ 15:25-26

2 ሚሺያ ሺሾይ ታ ሂንቴኮ ቢያ ዎዴ ጊደና ማላ ኢሶይ ኢሶይ ሳሚንታፌ ኮይሮ ጋላስ፣ ዎጋ ዎዴ ዎጋ ዎዴ ባ ዴሜይሳፌ ኬሲዲ ባ ሶን ዳጋዮ።

3 ታኒ ያ ቢዳ ዎዴ ሚሺያ ዩሩሳላሚ ጋላና ማላ ሂንቴ ዶሪያ ኣሳሰ ዱብዳቤ ኢማዳ ኤንታ ዩሩሳላሚ ኪታና።

4 ኤንታራ ታ ቡሳይ ኮሺያባ ጊዲኮ ኤንቴ ታራ ባናው ዳንዳጎሶና።

**ጳውሎሳ ቆፋ**

5 ታኒ ማቄደኒያራ ኣቆናው ቆፒዳ ጊሾ ያ ባዳ ሂንቴኮ ያና።

6 ታ ቢያሶ ኣው ጊዲኮካ፣ ታ ቡሳን ሂንቴ ታና ማዳና ማላ ሂንቴ ማታን ጉላ ዎዴ ጋምዎና ኣጊኬ። ባልጎ ኣጌናታ ሂንቴ ማታን ኣሉና ዋያ ኣጋና።

7 ታኒ ኦጌራ ኣቆሽ ሂንቴና ቤዓናው ኮዪኬ። ጎዳይ ጊኮ፣ ሂንቴ ማታን ጉላ ዎዴ ታካናው ቆፓይሰ።

8 ሺን ታኒ ጳንጻቆስጻ ባሌይ ጋካናው ኤፌሶናን ጋምዓና።

9 ታው ኦሶይ ኩሚዳ ዳልጋ ፔንጌይ ዶዩቴስ፣ ሺን ዳር ኤቁቴያ ሞርኬቴ ዴጎሶና።

10 ኢ ታ ማላ ጎዳ ኦሶ ኦሊያ ኣሲ ጊዲያ ጊሾ ጻሞቴዮሲ ሂንቴኮ ቢኮ፣ ሂንቴ ማታን ኢ ሂርጎና ዳና ማላ ኦሊቴ።

11 ኦኒካ ኢያ ካቶፖ። ኢ ታኮ ሳር ሲማና ማላ ኢያ ማዲዲ ሞይዚቴ። ታኒ ኢ ሃንኮ ኣማኔይሳታራ ሲማናይሳ ናጋይሰ።

12 ኑ ኦሻ ኣጲሎሲ ሃንኮ ኣማኔይሳታራ ሂንቴኮ ባና ማላ ታ ኢያ ሚንላ ዎሳስ። ሃዒ ሂንቴኮ ባናው ኮዪቤና፣ ሺን ኢያው ኢንጃቴያ ዎዴ ሂንቴኮ ባና።

**ወርሴላ ዞሬኔ ሳርሶ**

13 ባርኪቴ፤ ኣማኖን ኤቁቴ፤ ፃሊቴ፤ ሚኒቴ።

14 ኦሶ ኡባ ሲቆን ኦሊቴ።

15 ታ ኦሻቶ፣ ኢስጻፋኖሴይኔ ኢያ ሶ ኣሳይ ኣካያን ኤንቴ ኮይሮ ኣማኒዳይሳታ ጊዳይሳኔ ኣማኔይሳታ ማዳናው ባንታና ኣሊ ኣሚዳይሳ ሂንቴ ኤሬታ።

16 ሂንቴካ ኤንታ ማላ ኣሳሲኔ፣ ኤንታራ ኦሶን ዳቡሪያ ኡባሰ ኪቴታና ማላ ታ ሂንቴና ዎሳይሰ።

---

16:5 ሃ.ኦ 19:21      16:9 ሉዌ 23:15-21፤ ዛሬ 16:9-11፤ ሃ.ኦ 19:8-10  
16:10 1ቆር 4:17      16:15 1ቆር 1:16

17 ኢስጻፋኖሴይ፣ ፎርቹናሴኔ ኣካይቆሲ ታኮ ዩዳይሲ ታና ኡፋይሲሰ። ሂንቲ ባይና ቤሳን ኤንቲ ሂንቲና ጊዲዲ ታ ፓጫ ኩንሲዶሶና።

18 ኤንቲ ሂንቲና ኡፋይሲዳይሳዳ ታናካ ኡፋይሲዶሶና። ሄሳ ማላ ኣሳታ ዶጎፒቴ።

19 ኢሲያ ዎሳ ኬላ ኣሳይ ሂንቲና ሳር ጎሶና። ኣቁሊኔ ጸሪሰቁላ ባንታ ሶን ሺቂያ ዎሳ ኬላ ኣሳራ ኢሲፌ ሂንቲና ጎዳ ሱንላን ዎዛናፔ ሳርሶሶና።

20 ኣማኒያ ኣሻቲ ኡባይ ሂንቲና ሳር ያጎሶና።

ጌሻ ዩሬቴሊ ዩሬቴሽ ኢሶይ ኢሱዎ ሳርሊቴ።

21 ታኒ፣ ጳጤሎሲ፣ ሃ ሳርሉዎ ታ ኩሽን ፃፋሰ።

22 ጎዳ ዶሶና ኣሲ ዳዒኮ፣ ቃንጌቲዳይሳ ጊዶ። ኑ ጎዳው፣ ሃያ!

23 ጎዳ ዩሱሰ ኪሪሰቶሳ ኣቶ ኬሃቴላይ ሂንቲራ ጊዶ።

24 ታ ሲቆይ ኪሪሰቶሰ ዩሱሳን ዳዒያ ሂንቲ ኡባራ ጊዶ። ኣሚንዒ።

**ኦራሳ ጩቂዋ ጎፋላ**  
**New Testament in Gofa**

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-25

---

PDF generated using Haiola and XeLaTeX on 18 Apr 2025 from source  
files dated 29 Jan 2022

c35d6c73-3843-5482-b53e-7559d35deee5